

摘藻堂四庫全書薈要

史部

欽定四庫全書薈要卷六千七百九十三史部

明史卷二百

大學士張廷玉等奉 敕修

列傳第八十八

姚 模 子 來

張 嶺

伍文定 邢 珣等

蔡天祐 胡 璣
張文錦

詹 榮 劉源清

劉天和

楊守禮

張 岳 李允簡

郭宗臯

趙時春

姚鎮字英之慈谿人弘治六年進士除禮部主事進員外郎擢廣西提學僉事立宣成書院延五經師以教士子桂人祀山魈卓旺鎮毀像俗遂變遷福建副使未幾改督學政正德九年擢貴州按察使十五年拜右副都御史巡撫綏上邊務六事皆議行嘉靖元年濟農入涇陽鎮遣遊擊彭模出西路釋指揮卜雲於獄使副之夜半邀擊斬其二將乃遁璽書褒諭尋召為工部右待

郎出督漕運改兵部左侍郎四年遷右都御史提督兩
廣軍務兼巡撫田州土官岑猛謀不軌鎮調永順保靖
兵使沈希儀與張經李璋張佑程鑒各統兵八萬分道
討而鎮與總兵官朱麒等攻破定羅丹梁用希儀計結
猛婦翁岑璋使為內應大破之斬猛子邦彥璋誘殺猛
獻其首詔進鎮左都御史加太子少保任一子官諸將
進秩有差鎮請改設流官陳善後七事制可乃命參議
汪必東僉事申惠與參將張經以兵萬人鎮其地必東

惠移疾他駐猛黨盧蘇王受等詐言猛不死借交趾兵二十萬且至夷民信之蘇等薄城經突圍走城遂陷王受亦攻入思恩府巡按御史石金劾鎮失策罔上並論前總督盛應期帝以鎮有功許便宜撫勦蘇受數求救鎮不許將大討之會廷議起王守仁督兩廣軍令鎮與同事鎮引疾乞罷許馳驛歸初廣東提學道魏校毀諸寺觀田數千畝盡入霍韜方獻夫諸家鎮至廣追還之官韜獻夫恨甚與張璁桂萼合排鎮謂大同當征而反

撫田州當撫而反征皆費宏謀國不臧釀成南北患時
宏雖去猶借鑒以排之也鑒既得請方侯代千夫長韋
貫徐伍攻復恩恩鑒上其狀詔先賞貫等而以撫勦事
宜俟守仁處置既而鑒奏辯石金前疏詆金阻撓養寇
金亦再疏詆謨帝先入璉等言落鑒職閒住其後蘇受
復叛帝漸思鑒十三年三邊闕總制大學士費宏李時
同召對宏薦鑒時亦助之遂命以兵部尚書總制三邊
軍務未赴宏卒鑒辭帝不悅仍落職閒住鑒既罷薦者

至二十疏不用家居數年卒子洙字維東嘉靖二年殿試第一授翰林修撰爭大禮廷杖又議郊祀合祀不當輕易召修明倫大典懇辭不與累官侍讀學士

張嶺字時峻蕭山人成化二十三年進士弘治初修憲宗實錄命往蘇松諸府採軼事事竣授上饒知縣遷南京兵部主事就進刑部郎中正德初遷興化知府隆平侯張祐無子弟祿與族人爭鬻訴於南京法司久不決復訴京師劉瑾方擅政遂削尚書樊瑩都御史高銓籍

嶺以郎承勘為民瑾敗起知南雄擢江西參政進右布政使舉治行卓異遷左寧王宸濠欲拓地廣其居嶺執不可大恚遣人饋之嶺發視則棗梨薑芥蓋隱語也未幾召為光祿卿以右副都御史巡撫保定諸府忤中官移疾歸世宗即位命以右都御史總督兩廣軍務廣西上思州賊黃鏐糾峒兵劫州縣嶺計禽之廣東新寧恩平賊蔡猛三等剽掠衆至數萬嶺合兵三萬餘人擊新寧諸賊破巢二百禽斬一萬四千餘人俘賊屬五千九

百餘人猛三等皆授首自嶺南用兵以寡勝衆未有若是役者捷聞獎賚程鄉賊梁八尺等與福建上杭流賊相應遣都指揮李臯等會福建官兵夾擊俘斬五百餘人歸善李文積聚奸宄拒捕討之久弗克預遣參政徐度等勦之俘斬千餘人佛郎機國人別都盧剽劫滿刺加諸國復率其屬疎世利等擁五舟破巴西國遂入寇新會殲遣將出海禽之獲其二舟賊乃遁尋召掌南京都察院事就改工部尚書六年大計京官拾遺被劾致

仕後數年卒

伍文定字時泰松滋人父瑋貴州參議文定登弘治十二年進士有膂力便弓馬議論慷慨授常州推官精敏善決獄稱彊吏魏國公徐浦與民爭田文定勘歸之民劉瑾入浦重賄興大獄巡撫艾樸以下十四人悉被逮文定已遷成都同知亦下詔獄斥為民瑾敗起補嘉興江西姚源賊王浩八等流劫浙江開化都御史俞諷檄文定與參將李隆都指揮江洪僉事儲珊討之軍華埠

而都指揮白弘與湖州知府黃衷別營馬金賊黨劉昌
三破執弘官軍大挫浩八突華埠洪文定擊敗之追及
於孔埠隆珊亦追至地淮破其巢進攻淫田洪以奇兵
深入中賊誘與指揮張琳等皆被執文定等殿後得還
賊亦遁歸江西諫等上文定忠勇狀詔所司獎勞擢河
南知府計禽劇賊張勇李文簡以才任治劇調吉安計
平永豐及大帽山賊已佐巡撫王守仁平桶岡橫水宸
濠反吉安士民爭亡匿文定斬亡者一人衆乃定乃迎

守仁入城知府邢珣徐璉戴德孺等先後至共討賊文
定當大帥丙辰之戰身犯矢石火燎鬚不動賊平功最
推江西按察使張忠許秦至南昌欲冒其功而守仁已
俘宸濠赴浙江忠等失望大恨文定出謁遂縛之文定
罵曰吾不恤九族為國家平大賊何罪汝天子腹心屈
辱忠義為逆賊報讐法當斬忠益怒推文定仆地文定
求解任不報尋遷廣東右布政使未赴而世宗嗣位上
忠等罪狀且曰曩忠泰與劉暉至江西忠自稱天子弟

暉稱天子兒秦稱威武副將軍與天子同僚折辱命吏
誣害良民需求萬端漁獵盈百萬致餓殍遍野盜賊縱
橫雖寸斬三人不足謝江西百姓今大慙江彬錢寧皆
已伏法三人實其黨與乞速正天誅用章國典又請發
宸濠貲財還之江西以資經費矜釋忠泰所陷無辜及
寧府宗人不預謀者以清寬獄帝並嘉納之論功進右
副都御史提督操江嘉靖三年討獲海賊董效等二百
餘人賜敕獎勞尋謝病歸六年召拜兵部右侍郎其冬

擢右都御史代胡世寧掌院事雲南土酋安銓反敗參政黃昭道攻陷尋甸嵩明明年武定土酋鳳朝文亦反殺同知以下官與銓合兵圍雲南詔進文定兵部尚書兼前職提督雲南四州貴州湖廣軍討之以侍郎梁材督餉會芒部叛酋沙保子普奴為亂并以屬文定文定未至雲南銓等已為巡撫歐陽重所破遂移師征普奴左都御史李承勛極言川貴殘破不當用兵遂召還命提督京營文定至湖廣疏乞省祭歸己四川巡按御史

戴金復上言叛首稱亂之初勢尚可撫而文定決意進兵一無顧惜飛芻挽糧糜數十萬及有詔罷師尚不肯已又極論土酋阿濟等罪軍民訛言幾復生變臣愚以為文定可罪也尚書方獻夫李承勛因詆文定好大喜功傷財動衆乃令致仕文定忠義自許遇事敢為不與時俯仰芒部之後憤小醜數亂欲為國伸威為議者旁撓廟堂專務姑息以故功不克就九年七月卒於家天啟初追諡忠襄邢珣當塗人弘治六年進士正德初歷

官南京戶部郎中忤劉瑾除名瑾誅起南京工部遷贛
州知府招降劇盜滿總等授廬給田撫之甚厚後討他
盜多藉其力守仁征潢水桶岡珣常為軍鋒功最增二
秩宸濠反以重賞誘總總執其使送珣遂從珣共平宸
濠徐連朝邑人文定同年進士由戶部郎中出為袁州
知府從討宸濠獲首功千餘事定珣連遷江西右參政
世宗錄功各增秩二等嘉靖二年大計給事御史劾監
司不職者二十二人珣連與焉吏部以軍功未酬請進

秩布政使致仕從之二人竟廢珣子埴嘗學於張璉嘉靖初登鄉薦璉貴顯屢欲援之辭不應授浦城知縣有徐浦者役公府埴一見異之令與子同學為娶妻後登第為給事中其家世世祀埴弟址進士歷御史終山東鹽運使以清操聞戴德孺臨海人弘治十八年進士歷工部員外郎監蕪湖稅有清名再遷臨江知府宸濠反遣使收府印德孺斬之與家人誓曰吾死守孤城脫有急若輩沉池中吾不負國也即日戒嚴旋與守仁共滅

宸濠以憂去世宗以德孺馭軍最整獨增三秩為雲南
右布政使舟次徐州覆水死後贈光祿寺卿予一子官
珣連等倡義討賊月餘成大功當事者以嫉守仁故痛
裁抑之或賞或否又往往借考功法逐之去守仁之再
疏辭爵也為諸人訟曰宸濠變初起勢焰猖熾人心疑
懼退阻當時首從義師自伍文定邢珣徐璉戴德孺諸
人外又有知府陳槐曾瑛胡堯元寄知縣劉源清馬津
傅南喬李美李楫及楊材王冕顧必劉守緒王軾等鄉

官都御史王懋中編修鄒守益御史張鰲山伍希儒謝源等或摧鋒陷陣或遮邀伏擊或贊畫謀議監錄經紀所謂同功一體者也帳下之士若聽選官雷濟已故義官蕭禹致仕縣丞龍光指揮高睿千戶王佐等或詐為兵檄以撓其進止壞其事機或偽書反間以離其心腹散其黨與今聞紀功文冊改造者多所刪削舉人冀元亨為臣勸說寧王反為奸人構陷竟死獄中尤傷心慘目負之冥冥之中者夫宸濠積威凌劫雖在數千里外

無不震駭失措而況江西諸郡縣切近剝床觸目皆賊
兵隨處有賊黨非真有捐軀赴難之義勛力報主之忠
孰肯甘虀粉之禍從赤族之誅陷必死之地以希萬一
難冀之功乎今臣獨崇封爵而此同事諸人者或賞不
行而并削其績或賞未及而罰已先行或虛受陞職之
名而因使退閑或冒蒙不忠之號而隨以廢斥非獨為
已斥諸權奸所誣構挫辱而已也羣憎衆嫉惟事指摘
搜羅以為快曾未見有鳴其不平伸其屈抑者臣竊痛

之奏入卒寢不行

蔡天祐字成之睢州人父晟濟南知府以廉惠聞天祐登弘治十八年進士改庶吉士授吏科給事中出為福建僉事歷山東副使分巡遼陽歲歉活飢民萬餘闕濱海圩田數萬頃民名之曰蔡公田累遷山西按察使嘉靖三年大同兵亂巡撫張文錦遇害詔曲赦亂卒改巡撫宣府都御史李鐸撫之鐸以母憂不至乃擢天祐右僉都御史巡撫大同天祐從數騎馳入城諭軍士獻首

惡衆心稍定會尚書金獻民總兵官杭雄出師甘肅道
大同亂卒疑見討復鼓譟天祐懼急請再赦兵部言元
惡不除無以警後請特遣大臣總督宣大軍務以制其
變乃命戶部侍郎胡瓚偕都督魯綱統京軍三千人以
往瓚等未發而進士李枝齋餉銀至亂卒曰此承密詔
盡殺大同人為軍犒也夜中火起圍枝館出牒示之乃
解尋復殺知縣王文昌圍代王府脅王奏乞赦王急携
二郡主走宣府巡按御史王官言亂平方囂大兵壓境

是趣之叛也請亟止禁軍容臣密圖乃命瓚駐兵宣府

頃之天祐奏總兵官桂勇已捕五十四人請止京軍勿

遣帝責以阻撓令必獲首惡郭鑑等既而瓚次陽和勇

天祐令千戶苗登禽斬鑑等十一人函首送瓚請班師

甫二日鑑父郭庖子復糾徐禮兒等夜殺勇家人又燬

苗登家瓚言非盡殲不可帝乃切讓天祐召勇還京以

故總兵朱振代之敕瓚仍駐宣府居無何天祐捕戮徐

禮兒等瓚等遂班師明年正月侍郎李昆孟春總官官

馬永交章言疤子潛逃塞外必為後患帝將遣使勘會

瓚還京言逃卒無足患帝乃罷勘官勿遣疤子復潛入

城焚振第明旦天祐閉城大索獲疤子及其黨三十四

人悉斬以徇盡宥脅從人心乃大定事聞賚銀幣已進

副都御使巡撫如故尋就遷兵部右侍郎久之召還部

天祐以藩祿久缺又歲當繕邊垣用便宜增淮鹽引價

每引萬加銀五千被訐帝宥之至是御史李宗樞復追

論前事天祐因引疾去居二年奉詔起用未至京得疾

告歸卒年九十五天祐有才智兵變時左右皆賊耳目

幕府動靜悉知之天祐廣招星卜藝士往來軍中因具

得其情卒賴以成功在鎮七年威德大著父老為立安

輯祠胡瓚字伯珩永平人進士官終南京工部尚書張

文錦安邱人弘治十二年進士授戶部主事正德初為

劉瑾所陷逮繫詔獄斥為民瑾誅起故官再遷郎中督

稅陝西條上籌邊裕民十事遷安慶知府度寧王宸濠

必反與都指揮楊銳為禦備計宸濠果反浮江下文錦

等慮其攻南都令軍士登城詬之宸濠乃留攻卒不能
克事具楊銳傳璽書褒美擢太僕少卿嘉靖元年拜副
都御史巡撫大同文錦性剛以拒賊得重名遂乃銳意
振刷操切頗無序大同北四望平行寇至無可禦文錦
曰寇犯宣府不能近鎮城者以葛谷白楊諸堡為外蔽
也今城外即戰場何以示重議於城北九十里外增設
五堡曰水口宣河只河柳溝樺溝參將賈鑑督役嚴卒
已怨及堡成欲徙鎮卒二千五百家戍之衆憚行請募

新丁僚吏咸以為言文錦怒曰如此則令不行矣鎮親
兵先往孰敢後親兵素游惰有室聞當發大恐請子身
往得分番又不聽嚴趣之鑑承風杖其隊長諸邊卒自
甘州五衛殺隊長許銘朝廷處之輕頗無忌至是卒郭
鑑柳忠等乘衆憤遂倡亂殺賈鑑裂其屍走出塞屯焦
山墩文錦恐與外寇合令副將時陳等招之入城即索
治首亂者郭鑑等大懼復聚為亂焚大同府門入行都
司縱獄囚又焚都御史府門文錦踰垣走匿博野王府

第亂卒欲燔王宮王懼出文錦郭鑑等殺之亦裂其屍
遂焚鎮守總兵公署出故總兵朱振於獄賈為帥時嘉
靖三年八月也事聞帝命侍郎李昆赦亂卒昆為文錦
請卹典不報久之文錦父政訟其子守安慶功禮部為
之請終不許文錦妻李氏復上疏哀請帝怒命執贐疏
者治之副都御史陳洪謨言文錦債事朝廷戮之可也
假手士卒傳之四方損國威不小復降旨詰責自是廷
臣不敢言萬厯中始贈右都御史天啟初追諡忠愍

詹榮字仁甫山海衛人嘉靖五年進士授戶部主事歷
郎中督餉大同值兵變殺總兵官李瑾總督劉源清率
師圍城久不下榮素有智畧善應變叛卒掠城中無犯
榮者外圍益急榮密約都指揮紀振持擊戴濂鎮撫王
寧同盟討賊察叛卒馬昇楊麟無逆志乃陽令寧持官
民狀詣源清所為叛卒乞原而陰以榮謀告請宥昇麟
死畀三千金俾募死士自効會源清已罷巡撫樊繼祖
許之昇麟遂結心腹禽首惡黃鎮等九人戮之榮乃開

城門迎繼租入復捕斬二十六人錄功擢光祿寺少卿
再遷太常寺少卿二十二年以右僉都御史巡撫甘肅
魯默特貢使留甘州者九十餘人總兵官楊信驅以禦
寇死十之一榮言彼以好來而用之鋒鏑失遠人心且
示中國弱詔奪信官槥死者送之歸番人感悅踰年以
大同巡撫趙錦與總兵官周尚文不相能詔榮與錦易
任諳達數萬騎入掠榮與尚文破之黑山陽進右副都
御史寇復大舉犯中路參將張鳳等陣歿榮與尚文及

總督翁萬達嚴兵備陽和而遣騎邀擊多所殺傷寇乃引去代府奉國將軍充灼行剽榮奏奪其祿充灼等結小王子入寇謀據大同榮告尚文捕得皆伏辜榮以大同無險乃築東路邊牆百三十八里堡七墩臺百五十四又以子邊當積粟而近邊弘楊諸堡三十一所延亘五百餘里闢治之皆膏腴田可數十萬頃乃奏請召軍佃作復其租徭移大同一歲市馬費市牛賦之秋冬則聚而遏寇帝立從焉寇入犯與尚文破之彌陀山斬一

部長榮先以靖亂功進兵部右侍郎又以繕邊破敵累
被獎賚召還理部事進左尚書趙廷瑞罷榮署部務奏
行秋防十事已而翁萬達入為尚書遭母喪榮復當署
部務辭疾乞休帝怒奪職間往越二年卒當榮之撫大
同也萬達為總督尚文為總兵三人皆有才畧寇數入
不能得志自後代者不能任寇無歲不入躡邊人益思
榮等明年諳達薄京師萬達榮皆已去論者謂二人在
寇未必至此萬歷中榮孫廷為順天通判上書訟榮功

贈工部尚書予卹如制劉源清字汝澄東平人正德九年進士授進賢知縣宸濠反源清積薪環室命家人曰事急火吾家一僕逸手刃以徇縣中諸惡少與賊通者悉杖殺之宸濠妃弟婁伯歸上饒募兵源清邀戮之賊檄至立斬其使會餘干知縣馬津龍津驛丞孫天祐亦起兵拒賊賊七殿下者奪運舟於龍津天祐與戰殺數人賊黨募兵過龍津天祐追殺之焚其舟婁氏家衆西下亦為天祐所遇禽七十餘人賊兵不敢經湖東以窺

兩浙者 人力也賊平源清徵為御史嘉靖改元津亦

入為御史津滌州人終福建副使源清尋遷大理丞言

病歸六年夏以右僉都御史巡撫宣府滴水崖賊郭春

據城叛稱王源清遣卒捕之為所覺副總兵劉淵令曰

止禽元惡以旗繞城而呼其黨皆散春等自剄死總兵

官邵永崖下源清劾罷之進副都御史十二年以邊警

遷兵部左侍郎總制宣大山西保定諸鎮軍務大同總

兵官李瑾浚天城左孤店濠西十里趣工急卒王福勝

等焚殺瑾因焚巡撫潘倣署倣奏瑾激變帝命源清同
總兵卻永討之源清榜令解散而榜言五堡變處之過
寬五堡遺孽大懼師次陽和倣等密捕亂卒杖死十餘
人繫賊首王保等七十餘人以獻請旋師源清懲晉胡
瓚事不欲以以囚屬御史蘇祐因妄言前總兵朱振失
職首亂且多引無辜源清遣參將趙綱入城大索城中
訛言城且屠亂卒遂鼓譟殺千戶張欽會僉事孫允中
自源清所至諭源清意撫慰之始定振前為亂卒所擁

實不反詣源清自明不能白發憤自殺永兵至城下大

掠五堡遺孽遂盡反迎戰殺遊擊曹安官軍攻據四關

晝夜圍擊亂卒出前參將黃鎮等於獄奉為帥死守倣

與鎮國將軍俊樞等登城止毋攻俊樞出見永請緩兵

皆不聽允中縋城出言將士妄殺狀源清叱曰汝為賊

游說耶欲囚之允中不敢歸源清因多設邏卒遏王府

及有司軍民章疏而請益師至五萬帝命侍郎錢如京

都督江桓統京軍八千以往已忽悟罷勿遣專責源清

永討賊倣馳疏言將士妄殺激變速旋師亂可已源清亦詆倣媚賊張孚敬主源清侍郎顧鼎臣黃綰言用兵謬帝不能決城圍久大困毀王府及諸廨舍供費兵部復下安撫令源清亦樹幟招降叛卒稍稍自投首惡黃鎮等亦分日出見乞通樵採路永許諾翌日採薪者出永悉執之城中人益懼亂卒復叛勾外寇為助永遇之大敗而遁叛卒遂引寇十餘騎入城指代府曰以此為那顏居那顏者華言大人也城中人聞之皆巷哭明日

外寇攻東南二關叛卒與犄角官軍殊死戰互有殺傷
寇知叛卒不足賴倒戈擊之大詔而去是時寇游騎南
掠至胡應源清請募九邊兵增總制官禦之已得一意
攻城帝不許源清乃百道攻穴城為毒烟薰死者相藉
復請壅水灌之帝大不懌奪其職閒住以兵部侍郎張
瓚代之瓚未至郎中詹榮等已悉捕首惡黃綰勘功罪
言源清永實罪魁具劾其婪賄不貲狀兵科曾忭等言
宸濠亂源清有保障功當蒙八議之貸帝怒下忭等詔

獄逮源清治之獄久不決瑄憂去乃戒死斥為民諳達
薄京師即家起之未赴而卒隆慶初贈兵部尚書

劉天和字養和麻城人正德三年進士授南京禮部主
事劉瑾黜御史十八人改他曹二十四人補之天和與
焉出按陝西鎮守中宮廖堂奉詔辦食御物於蘭州天
和謂非所部辭不往堂奏天和拒命詔逮之部民哭送
者萬人錮詔獄久不釋吏部尚書楊一清疏救法司奏
當贖杖還職中旨謫金壇丞刑部主事孫繼芳抗章救

不報屢遷湖州知府多惠政嘉靖初擢山西提學副使
累遷南京太常少卿以右僉都御史督甘肅屯政請以
肅州丁壯及山陝流民於近邊耕牧且推行於諸邊尋
奏當興革者十事田利大興改撫陝西請撤鎮守中官
及罷為民患者三十餘事帝皆從之洮岷番四十二族
蠢動天和誅不順命者又討平湖店大盜及漢中妖賊
就進右副都御史母憂服闋以故官總理河道黃河南
徙歷濟徐皆旁溢天和疏汴河自朱仙鎮至沛飛雲浦

殺其下流疏山東七十二泉自鳧尼諸山達南旺湖濬其下流役夫二萬不三月訖工加工部右侍郎故事河南八府歲役民治河不赴役者人出銀三兩天和因歲飢請盡捐旁河受役者課遠河未役者半之詔可十五年改兵部左侍郎總制三邊軍務兵車皆雙輪用二十人遇險即困又行遲不適於用天和請倣前總督秦鏐隻輪車上置砲槍斧戟廂前樹狻猊牌左右虎盾連三車可蔽三四十人一人輓之推且翼者各二人戰則護

騎士其中敵遠則施火器稍近發弓弩又近乃出短兵
敵走則騎兵追復製隨車小帳令士不露宿又毒弩矢
修邊牆濠塹皆從之濟農十萬衆屯賀蘭山後遣別部
寇涼州副將王輔逐奪其纛寇莊浪總兵官姜顛屢敗
之進天和都御史寇復大集兵將入犯天和策寇兵闕
西有備必東密檄延綏副將白爵宵行與參將吳瑛合
寇果東入黑河墩遇爵伏兵大創而去既又入蒺藜川
爵尾擊之寇多死尋入寇家澗張家塔為爵瑛所敗犯

寧夏者總兵官王效復破之帝大喜進天和左都御史
濟農犯河西天和禦却之進兵部尚書寇將入平虜城
天和伏兵花馬池寇戰不勝走河上遇伏兵多死於水
濟農乘虛寇固原剽掠且饜會淫潦弓矢盡膠無關志
而諸將多畏縮天和斬指揮二人召故總兵周尚文令
立功會陝西總兵官魏時角寇至黑水苑尚文盡銳夾
擊殺濟農子小十王寇退寧夏巡撫楊守禮總兵官任
傑等復邀擊敗之鐵柱泉斬獲兵四百四十餘級論功

加天和太子太保廕一子錦衣千戶前後賚銀幣千數
遷南京戶部尚書召為兵部尚書督團營言官論天和
衰老遂乞休歸家居三年卒贈少保謚莊襄天和初舉
進士劉瑾欲與叙宗姓謝不往晚年內召陶仲文以刺
迎稱戚屬天和返其刺曰悞矣吾中外姻連無是人仲
文恚其罷官有力焉

楊守禮字秉節蒲州人正德六年進士除戶部主事嘉
靖初屢遷湖廣僉事以計禽公安賊魁坐事謫叙州通

判累遷右副都御史巡撫四川與副將何卿平諸番亂

賚銀幣初守禮貶叙州為僉事張文奎所辱至是文奎

遷四川參議恐守禮修隙先以所撫事奏詔二人俱解

職歸守禮才器敏達中外以為能居家未久工部尚書

秦金等會薦起河南參政再遷右副都御史巡撫寧夏

寇犯固原為總督劉天和所敗欲自寧夏去守禮與總

督兵任傑等邀敗之會天和召還進守禮右都御史總督

軍務代之錄前功進兵部尚書總兵官李義楊信連却

濟農三賜璽書銀幣尋上疏乞休帝惡其避難降俸二級其秋寇三萬騎抵綏德游擊張鵬却之總兵官吳英等追至塞外東路叅將周文兵亦至夾擊敗之巡按御史殷學言寇入內地五百里請治諸將罪部議延綏游兵俱調宣大寇方避實擊虛而我能以寡勝衆宜錄其功乃加守禮太子少保學謫外守禮尋以憂去諡達薄都城廷臣首以守禮薦詔趣上道寇退止不行久之卒張岳字維喬惠安人自幼好學以大儒自期登正德十

一年進士授行人武宗寢疾豹房請令大臣侍從臺諫

輪直起居視藥餌防意外變不報與同官諫南巡杖闕

下謫兵部司務歷武選員外郎岳雅負時望尋以母老

乞便養改南京武選員外郎歷主客郎中方議大禘禮

張璉求始祖所自出者實之禮官皆唯唯岳言於尚書

李時曰不如為皇初祖母母實以人時大喜告璉璉不

謂然以初議上帝竟令題皇初祖主如岳言璉銜之出

為廣西提學僉事行部柳州軍缺餉大譁城閉五日岳

令守城啟門召詰譁者予餉去尋以計禽首惡置以理
入賀改提學廣西不謝璉璉黜廣西選貢七人謫岳廣
東鹽課提舉遷廉州知府督民懇棄地教以桔槔運水
廉民多盜珠池岳居四年未嘗貢獻一珠帝使往安南
詰莫登庸殺主岳言於總督張經曰莫氏篡黎可無勘
而知也往往受謾詞辱國請留使者毋前經不可知欽
州林希元上書請決計莫氏岳貽書止之復條上不可
詰六事為書貽執政曰據邊民報黎調襲封無嗣以兄

子諲為子陳暉作亂調遇害暉篡未幾國人擁立諲暉
奔諒山諲立七年為莫登庸所逼出居升華登庸立諲
弟慮而相之卒弑慮自立國分為三黎在南莫居中中
陳在西北後諒山亦為登庸有陳遂絕而黎所居即古
日南地與占城隣限大海登庸不能踰之南故兩存近
登庸又以交州付其孫福海而自營海東府地都齋居
之蓋安南諸府惟海東地最大即所謂王山郡也此賊
負篡逆名常練兵備我又時陽言求入貢邊人以非故

王也弗敢聞愚以為彼內亂未嘗有所侵犯可且置之
待其亂定乃貢若必用兵勝負利鈍非岳所敢知執政
得書不能決已毛伯溫來視師張經一以軍事委岳又
以翁萬達才進二人於伯溫岳與伯溫語數日伯溫曰
交事屬君矣許登庸如岳議會岳遷浙江提學副使又
遷參政伯溫馳奏留之乃改廣東參政分守海北登庸
降加岳俸一級賜銀幣尋以征瓊州叛黎功加俸及賜
如之塞上多事言官薦岳邊才伯溫言岳可南翁萬達

可北也遂擢岳右僉都御史撫治鄖陽旋移撫江西進
右副都御史總督兩廣軍務兼巡撫討破廣東封川獐
蘇公樂等進兵部右侍郎平廣西馬平諸縣徭賊先後
俘斬四千招撫二萬餘人誅賊魁韋金田等增俸一級
召為刑部右侍郎以御史徐南金言命留任連山賊李
金與賀縣賊倪仲亮等出沒衡永郴桂積三十年不能
平岳大合兵討禽之蒞鎮四年巨寇悉平召拜兵部左
侍郎湖貴間有山曰蜡爾諸苗居之東屬鎮溪千戶所

算子坪長官司隸湖廣西屬銅仁平頭二長官司隸貴
州北接四川酉陽廣袤數百里諸苗數反官兵不能制
侍郎萬鏜征之四年不克乃授其魁龍許保冠帶湖苗
暫息而貴苗反如故鏜班師龍許保及其黨吳黑苗復
亂貴州巡撫李義壯告警乃命岳總督湖廣貴州四川
軍務討之進右都御史義壯持鏜議欲撫岳劾其阻兵
罷之先義壯撫貴州者僉都御史王學益與鏜附嚴嵩
主撫議數從中撓岳岳持益堅許保襲執印江知縣徐

文伯及石阡推官鄧本忠以去岳坐停俸乃使總兵官
沈希儀參將石邦憲等分道進攻入銅仁督之先後斬
賊魁五十三人獨許保黑苗跳不獲岳以捷聞言貴苗
漸平湖苗聽撫請遣土兵歸農朝議許之未幾酉陽宣
慰冉元嗾許保黑苗突思州刦執知府李允簡邦憲兵
邀奪允簡還允簡竟死嵩父子故憾岳欲逮治之徐階
持不可乃奪右都御史以兵部侍郎督師邦憲等旋破
賊岳搜山箐餘賊獻思州印及許保湖廣兵亦破禽首

惡李通海等岳以黑苗未獲不敢報功已而冉元謀露
岳發其奸元賄嚴世蕃責岳絕苗黨邦憲竟得黑苗以
獻苗患乃息岳卒於沅州喪歸沅人迎哭者不絕已叙
功復右都御史贈太子少保諡襄惠岳博覽工文章經
術湛深不喜王守仁學以程朱為宗李允簡融縣人由
舉人起家以郡境多寇遣孥歸獨與孫炳文居祖孫皆
被執許保挾以求厚贖允簡則傳語邦憲令亟進兵在
賊中自投高崖下賊曳出棄之途思人昇還至清浪衛

而卒詔贈貴州副使賜祭葬官一子

郭宗臯字君弼福山人嘉靖八年進士選庶吉士尋詔

與選者皆改除得刑部主事擢御史十二年十月星隕

如雨未幾哀冲太子薨大同兵亂宗臯勸帝惇崇寬厚

察納忠言勿專以嚴明為治帝大怒下詔獄杖四十釋

之歷按蘇松順天行部乘馬不御肩輿會廷推保定巡

撫劉夔還理院事宗臯論夔嘗薦大學士李時子諂媚

無行不任風紀坐奪俸兩月尋出為雁門兵備副使轉

陝西參政遷大理少卿二十三年十月寇入萬全右衛
抵廣昌列營四十里順天巡撫朱方下獄擢宗臯右僉
都御史代之寇已去宗臯言密雲最要害宜宿重兵乞
敕馬蘭太平燕河三屯歲發千人以五月赴密雲有警
則總兵官自將赴援居庸白楊地要兵弱遇警必待部
奏不能及事請預擬借調之法令建昌三屯軍平時則
協助密雲遇警則移駐居庸俱報可久之宗臯聞敵騎
四十萬欲分道入奏調京營山東河南兵為援已竟無

實坐奪俸一年故事京營歲發五軍詣薊鎮防秋宗臯
請罷三軍以其犒軍銀充本鎮募兵費又請發修邊餘
銀增築燕河營古北口帝疑有侵冒令罷歸聽勘既而
事得白起故官巡撫大同與宣府巡撫李仁易鎮尋進
兵部右侍郎總督宣大山西軍務諳達三萬騎犯萬全
左衛總兵官陳鳳副總兵林椿與戰鷓兒嶺殺傷相當
宗臯坐奪俸明年再犯大同總兵官張達及椿皆戰死
宗臯與巡撫陳耀坐奪俸給事中唐禹追論死事狀因

言全軍悉陷乃數十年未有之大衄帝乃逮宗臯及耀
各杖一百耀遂死宗臯戍陝西靖虜衛隆慶改元從戍
所起刑部右侍郎改兵部協理戎政旋進南京右都御
史就改兵部尚書參贊機務給事中莊國禎劾宗臯哀
庸宗臯亦自以年老求去詔許之萬厯中再存問歲給
廩隸十六年宗臯年九十又遣行人存問是年卒贈太
子太保諡康介

趙時春字景仁平涼人幼與羣兒嬉輒列旂幟部勒如

兵法年十四舉於鄉踰四年為嘉靖五年會試第一選庶吉士以張璁言改官得戶部主事尋轉兵部九年七月上疏曰陛下以災變求言已旬月大小臣工率浮詞面謾蓋自靈寶知縣言河清受賞都御史汪鋐繼進甘露今副都御史徐讚訓導范仲斌進瑞麥指揮張楫進嘉禾鎔及御史楊東又進鹽華禮部尚書李時再請表賀仲斌等不足道鋐讚司風紀時典三禮乃罔上欺君壞風傷政帝責其妄言且令獻諫言善策時春惶恐引

咎未對帝趣之於是時春上言當令之務最大者有四
最急者有三最急者曰崇治本君之喜怒賞罰所自出
勿以逆心事為可怒則賞罰大公而天下治曰信號令
無信一人之言必參諸公論毋徂一時之近必稽之永
遠苟利十而害一則利不必興功百而費半則功不必
舉如是而天下享安靜之福矣曰廣延訪宜倣古人輪
對及我朝宣召之制使大臣臺諫侍從各得敷納殿陛
間羣吏則以其職事召問之曰勵廉耻大臣宜待以禮

取大節畧小過臺諫言是者用之非者寬容之庶臣工
自愛不敢不勵其最急者曰惜人才凡得罪諸臣其才
不當棄其過或可原宜霽然發令召還故秩且因南郊
禮成除謫戍之罪與之更始曰固邊圉敗軍之律宜嚴
臨陣而退者裨將得以戮士卒大將得以戮裨將總制
官得以戮大將則人心震悚而所向用命曰正治教請
復古冠婚喪祭之禮絕醮祭禱祀之術凡佛老之徒有
假引符錄依托經懺幻化黃白飛昇遐景以冒寵祿者

即賜遣斥則正道修明而民志定帝覽之益怒下詔獄
掠治黜為民久之選東宮官屬起翰林編修兼司經局
校書帝有疾時春與羅洪先唐順之疏請東宮御殿受
百官正旦朝賀帝大怒復黜為民京師被寇朝議以時
春知兵起兵部主事贊理京營務統民兵訓練大將軍
仇鸞倡馬市時春憤曰此秦檜續耳身為大將而效市
僧可乎忤鸞為所構幾重得罪稍遷山東僉事進副使
三十二年擢僉都御史巡撫山西時春慷慨負奇氣善

騎射慨寇縱橫將帥不任戰數謂人使吾領選卒五千
諳達邱福不足平也作禦寇論論戰守甚悉既秉節鉞
益思以武功自奮其年九月寇入神池利民諸堡時春
率馬步兵往禦之至廣武諸將畢會謀報寇騎二千餘
去兩舍時春擐甲欲馳大將李淶固止之時春大言曰
賊知吾來必遁緩追即不及逆策馬前及於大蟲嶺伏
兵四起敗績倉皇投一墩守卒絕之上乃得免淶軍竟
覆被論解官聽調時春喜談兵至是一戰而敗然當是

時將帥率避寇不擊為督撫者安居堅城遙領軍事無躬搏寇者時春功雖不就天下皆壯其氣時春讀書善強記文章豪肆與唐順之王慎中齊名詩伉浪自喜類其為人

贊曰姚鏌等封疆宣其擘畫軍務倡其機謀勲績咸有可紀伍文定從王守仁平宸濠之難厥功最懋趙時春將畧自命一出輒躡夫危事而易言之固知兵者所弗取乎

明史卷二百

欽定四庫全書

明史卷二百考證

姚鎔傳遷福建副使

臣章宗瀛按鎔任福建副使時

嘗定計討平大帽山賊劉龍等見明翟鑒所撰墓志傳未載謹附考

姚鎔傳巡撫延綏上邊務六事

臣章宗瀛按姚鎔所

陳邊六事明寔錄不載獻徵錄今獻備遺諸書亦無

可考謹識

姚鑊傳陳善後七事

臣章宗瀛按鑊所陳善後事宜

明寔錄但言改流官增兵戍而已未臚舉其目他書

亦無可考謹識

張嶺傳嶺以郎承勘為民

臣章宗瀛按獻徵錄載嶺

官興化時郡人戴大賓弱冠及第劉瑾欲以侄女奪

其舊聘囑嶺主之嶺拒不從遂為所惡借張祐事落

其職傳未詳載謹附考

張嶺傳召為光祿卿

臣章宗瀛按嶺之內擢由宸濠

忌其不為已用行賄陰使之見明費宏所撰行狀傳
未之載謹識

蔡天祐傳歷山東副使

臣

章宗瀛按天祐官山東時

曾平濟南龍山及淄川盜見獻徵錄謹附考

蔡天祐傳張文錦督稅陝西上籌邊裕民十事

臣章

宗瀛按文錦所陳籌邊裕民十事明寔錄未載他書
亦無可考謹識

詹榮傳督餉大同值兵變

臣

章宗瀛按大同兵變在

嘉靖十二年十月蓋張文錦之後至是凡再亂見明
實錄謹附考

劉天和傳尋奏當興革者十事田利大興臣章宗瀛

按天和所言當革五曰梧寇曰占役曰湖場曰泮撥
曰侵漁當興者五曰開墾曰整堡曰牛種曰治水曰
屯兵見明世貞所撰墓誌銘謹附考

張岳傳入賀臣章宗瀛按岳之入賀在嘉靖十一年

以世宗壽節也

張岳傳移撫江西

臣章宗瀛傳岳撫江西時夏言治

生塚議費於廣信七縣縣措千金岳改為百金及嚴
嵩賜第名其閭曰延恩命官為經理岳批牘與千金
吏請益增五百金而貽書于嵩諷以戒侈二事皆見
識大錄傳未載謹識





總校官編修臣吳紹濬

欽定四庫全書薈要

史部

明史卷二百二



詳校官主事臣陳木

欽定四庫全書薈要卷六千七百九十四

史部

明史卷二百一

大學士張廷玉等奉敕修

傳第八十九

陶琰

子

滋

王縝

李充嗣

吳廷舉

弟廷弼

方良永

弟良節
子重杰

王爌

王軌

徐問

張邦奇

族父時微

韓邦奇

弟邦靖

周金

吳

嶽

譚大初

陶琰字廷信絳州人父銓進士陝西右叅議琰舉成化七年鄉試第一十七年成進士授刑部主事弘治初進員外郎歷固原兵備副使練士卒廣芻粟歷九年部內晏如遷福建按察使浙江左布政使正德初以右副都御史巡撫河南遷刑部右侍郎陝西遊擊徐謙許御史李高謙故劉瑾黨行厚賂欲中高危法琰往按直高瑾

怒假他事下琰詔獄褫其職又罰米四百石輸邊瑾誅

起左副都御史總督漕運兼巡撫淮揚諸府六年轉南京刑部侍郎明年賊劉七等將犯江南王浩八又入衢州進琰右都御史巡視浙江至則七等已滅浩八聽撫會寧紹瀕海地颶風大作居民漂沒萬數琰出帑金賑救而大築蕭山至會稽堤五萬餘丈奏設兵備道守要害防浩八黨出沒遣將擊斬其渠魁遂城開化常山遂安蘭谿境內以靖復命總督漕運七疏乞歸世宗嗣位

起故官凡三督漕軍民習其政不嚴而肅琰性清儉飯
惟一蔬每到官及罷去行李止三竹筭尋加戶部尚書
嘉靖元年召拜工部尚書其冬改南京兵部加太子少
保未浹歲屢引年乞休加太子太保乘傳歸有司歲時
存問又九年卒年八十有四贈少保謚恭介子滋以進
士授行人諫武宗南巡杖闕下謫國子學正嘉靖初歷
兵部郎中率同官伏闕爭大禮再授杖謫戍榆林兵部
尚書王時中等言琰老病呻吟冀父子一相見乞改調

近衛不許十五年赦還卒

王縝字文哲東莞人父恪寶慶知府縝登弘治六年進士選庶吉士授兵科給事中劾三邊總制王越附汪直李廣不可復玷節鉞出理南畿屯田有司徵松江白紵六千疋縝言紵非正供且請停上清宮役詔皆罷之累遷工科都給事中武宗初立內府工匠以營造加恩縝率同官言陛下初登大寶工匠末技已有以微勞進者誠不可示後世宜散遣先朝諸畫士革工匠所授官帝

不能用中官張永請改築通州新城鎮言泰陵工作方
興不當復興無益之後帝乃止正德元年出為山西右
叅政歷福建布政使遷右副都御史巡撫蘇松諸府協
平江西賊王浩八乾清宮災疏請養宗室子宮中定根
本去南京新增內官召還建言被黜諸臣不報已調鄭
陽巡撫遷南京刑部右侍郎世宗即位陳正本十事嘉
靖二年就擢戶部尚書卒於官

李充嗣字士修內江人給事中蕃孫也登成化二十三

年進士改庶吉士弘治初授戶部主事以從父臨安為
郎中改刑部坐累謫岳州通判久之移隨州知州擢陝
西僉事歷雲南按察使正德九年舉治行卓異累遷右
副都御史巡撫河南歲大祲請發帑金移粟賑之不足
則勸貸富室時流民多聚開封煮糜哺之踰月資遣還
鄉初鎮守中官廖堂黨於劉瑾假進貢名要求百端繼
者以為常充嗣言近中官進貢有古銅器密變盆黃鷹
角鷹錦雞走狗諸物皆假言科歛外又有拜見銀須知

銀及侵扣驛傳快手月錢河夫歇役之屬無慮十餘事
苛派動數十萬其左右用事者又私於境內抑買雜物
擅權商賈貨利乞嚴行禁絕詔但禁下人科取而已十
二年移撫應天諸府寧王宸濠反充嗣謂尚書喬宇曰
都城守禦屬於公畿輔則充嗣任之乃自將精兵萬人
西屯采石遣使入安慶城中令指揮楊銳等堅守傳檄
部內聲言京邊兵十萬旦夕至趣供餉以紿賊賊果疑
懼事定兵部及巡按御史胡潔言其功時已就進戶部

右侍郎乃賜敕嘉勞有建議修蘇松水利者進充嗣工

部尚書兼領水利事未幾世宗嗣位遣工部郎林文需

顏如瓌佐之開白茅港疏吳淞江六閱月而訖工語詳

河渠志嘉靖元年論平宸濠功加太子少保蘇松白糧

輸內府正德時驟增內使五千人糧亦加十三萬石帝

用充嗣言減從故額又請常賦外盡蠲歲辦之浮額者

內府徵收監以科道官毋縱內臣苛索帝俱從之尋改

南京兵部尚書七年致仕卒久之詔贈太子太保謚康

和

吳廷舉字獻臣其先嘉魚人祖戍梧州遂家焉成化三十三年登進士除順德知縣上官屬修中貴人先祠廷舉不可市舶中官市葛以二葛與之曰非產也中官大怒御史汪宗器亦惡廷舉曰彼專抗上官市名耳會廷舉毀淫祠二百五十所撤其材作堤葺學宮書院宗器謂有所侵盜執下獄按之不得間慚而止為縣十年稍遷成都同知憂歸補松江用尚書馬文升劉大夏薦擢

廣東僉事從總督潘蕃討平南海清遠諸盜正德初歷副使發總鎮中官潘忠二十罪忠亦許廷舉他事逮繫詔獄劉瑾矯詔枷之十餘日幾死成雁門旋赦免楊一清薦其才擢江西右叅政敗華林賊於連河從陳金大破姚源賊其黨走裴源復從俞諫破之賊首胡浩三既撫復叛廷舉往諭為所執居三月盡得其要領誘使攜及得還浩三果殺其兄浩二內亂官兵乘之遂禽浩三與副使李夢陽不協奏夢陽侵官因乞休不俟命竟去

坐停一歲俸起廣東右布政使復佐陳金平府江賊擢
右副都御史賑湖廣饑已復出湖南定諸夷疆地寧王
宸濠有逆謀疏陳江西軍政六事為豫防計世宗立召
為工部右侍郎旋改兵部上疏詆陸完王瓊梁儲及少
傅蔣冕而自以為已昔居憲職無一言乞罷黜以儆幸
位時完早得罪瓊亦儲已罷去廷舉借以傾冕冕亦求
罷帝頗不直廷舉調南京工部而慰諭冕冕固請留之
不聽嘉靖元年廷舉乞休尋以災異復自劾求罷勸帝

修德應天因奏行其部興革十二事尋就改戶部遷右都御史巡撫應天諸府長洲知縣郭波以事挫織造中官張志聰志聰伺波出倒曳之車後典史蕭景腆操兵教場急率兵救百姓登屋飛瓦擊志聰志聰奏逮波景腆廷舉具白志聰貪黷狀帝乃降波五級調景腆遠方志聰亦召還三年以大禮議未定請如洪武中修孝慈錄故事令兩京部寺臺省及天下督撫各條所見並詢家居老臣采而行之彙為一書以詔後世時已定稱本

生考廷舉窺帝意不憚故為此奏給事中張原劉祺交
劾之不報尋改南京工部尚書辭不拜稱疾乞休帝慰
留已復辭且引白居易張詠詩語多詼諧中復用嗚呼
字帝怒以廷舉怨望無人臣禮勒致仕廷舉面如削爪
衣敝帶穿不事藻飾言行必自信人莫能奪其在太學
時兄事羅玘玘病痢僕死自煮藥飲之負以如廁一晝
夜數十反玘嘗語人曰獻臣生我廷舉好薛瑄胡居仁
學尊事陳獻章居湫隘亡郭外田有書萬卷及卒總督

姚鎮元其喪隆慶中追謚清惠弟廷弼舉於鄉廷舉枷吏部前廷弼卧其械下刑部主事宿進為奏記張綵乃得釋

方良永字壽卿莆田人弘治三年進士督捕兩廣峻却饋遺為布政使劉大夏所罷還授刑部主事進員外郎擢廣東僉事瓊州賊符南蛇為亂大夏時為總督檄攝海南兵備會師討平之御史坐良永失利大夏已入為本兵為白於朝賚銀幣正德初父喪除待銓闕下外官

朝見畢必謁劉瑾鴻臚導良永詣左順門叩頭畢令東
向揖瑾良永竟出或勸詣瑾家良永不可及吏部除良
永河南撫民僉事中旨勒致仕既去瑾怒未已欲假海
南殺人事中之刑部郎中周敏力持乃不坐瑾誅起湖
廣副使尋擢廣西按察使發巡按御史朱志榮罪至謫
戍遷山東右布政使旋調浙江改左錢寧以鈔二萬粥
於浙良永上疏曰四方盜甫息瘡痍未瘳浙東西兩
寧廩養賤流假義子名躋公侯之列賜予無算納賄不

賞乃敢攫民財戕邦本有司奉行急於詔旨胥吏緣為
奸椎膚剥髓民不堪命鎮守太監王堂劉璟畏寧威受
役使臣何敢愛一死不以聞乞陛下下寧詔獄明正典
刑並治其黨以謝百姓寧懼留疏不下謀遣校尉捕假
勢粥鈔者以自飾於帝而請以鈔直還之民陰召還前
所遣使寧初欲散鈔徧天下先行之浙江山東山東為
巡撫趙璜所格而良永白發其奸寧自是不敢粥鈔矣
寧方得志公卿臺諫無敢出一語良永以外僚訟言誅

之聞者震悚良永念母老恐中禍三疏乞休去世宗即位中外交薦拜右副都御史撫治鄖陽以母老再疏乞終養都御史姚鏌請破格褒寵尚書喬宇孫交言良永家無贏貲宜用侍郎潘禮御史陳茂烈故事賜廩米詔月給三石久之母卒詔賜祭葬皆異數也服除以故官巡撫應天即家賜敕至衛州疾作連疏乞致仕未報遽歸卒卒後有南京刑部尚書之命暨計聞賜卹如制謚簡肅良永侍父疾衣不解帶者三月母病良永年六十

餘矣手進湯藥無少怠居倚廬哀毀稱純孝焉素善王
守仁而論學與之異嘗語人曰近世專言心學自謂超
悟獨到推其說以自附於象山而上達於孔子目聖賢
教人次第為小子無用之學程朱而下無不受擯而不
知其入於妄弟良節官廣東左布政使亦有治行子重
杰舉於鄉以孝聞

王壙字存納黃巖人弘治十五年進士除太常博士正
德時屢遷刑科都給事中武定侯郭勛鎮兩廣行事乖

謬詔自陳勛強辨壙等駁之都察院覆奏不錄壙言壙並劾都御史彭澤帝責澤置勛不問御史林有年直言下獄浙江僉事韓邦奇忤中官被逮壙皆救之帝幸大同久不反壙力請回鑾又與工科石天柱救彭澤忤王瓊中旨調兩人於外壙得惠州推官世宗立召復都給事中旋擢太僕少卿改太常嘉靖三年遷應天府尹歲大侵奏免其賦居四年遷南京刑部右侍郎以母老歸養家居十年起故官尋擢南京右都御史守備中官進

表率以兩御史監禮壙曰中官安得役御史止之奉賀
入朝謁內閣夏言言倨甚大臣多隅坐壙獨引坐正之
言不悅壙遂謝病歸壙與御史潘壯不相能壯坐大獄
詔壙提問壙力白壯罪至忤旨人以此稱壙長者卒贈
工部尚書

王軌開平衛人弘治十二年進士正德初歷工部員外
郎屢遷山東左布政使嘉靖初入為順天府尹房山地
震軌言名災有由語多指斥忤旨切責尋遷右副都御

史巡撫四川芒部土官知府隴慰死庶子政與嫡子壽
爭立朝議立壽政倚烏撒數構兵使人誘殺壽奪其印
軌請討之乃會貴州兵分道進禽政於水西招降四十
九砦璽書獎勞時將營仁壽宮就拜軌工部右侍郎督
採大木工罷召還改戶部覈九門首管地以餘地歸之
民勘御馬監草場釐地二萬餘頃募民以佃房山民以
牧馬地獻中官韋恒軌釐歸之官奸人馮賢等復獻中
官李秀秀為請於帝軌抗疏劾之帝雖宥秀竟治賢等

如律出覈勛戚莊田請如周制計品秩別親疏以定多

寡非詔賜而隱占者俱追斷戶部尚書梁材採其言兼
并者悉歸官稍進左侍郎初軌之平隴政也以隴氏無
後請改設流官兵部尚書李鉞等然之遂改芒部為鎮
雄府分置四長官司授隴氏疏屬阿濟等為長官而擢
重慶通判程洸為試知府隴氏舊部沙保等攻執洸奪
其印欲復立隴氏後巡撫王廷相等破保洸得還保子
普奴復連烏撒水西苗攻剽畢節諸衛帝命伍文定圖

之以朝議不合召還御史戴金因言芒部改流之議諸
司咸執不可軌徇沈邪說違衆獨行致疆場不靖遂罷
軌官以兵部尚書李承勛薦起故官總督倉場再遷南
京戶部尚書御史龔澍劾軌考悖吏部言軌居官儉素
搢紳儀表帝乃責澍妄言久之就改兵部叅贊機務詔
舉將材薦鄭卿沈希儀等二十一人皆擢用居四年以
老乞罷疏中言享年若干帝以為非告君體勅為民久
之卒

徐問字用中武進人弘治十年舉進士授廣平推官遷
刑部主事歷兵部出為登州知府地濱海多盜問盡捕
之調臨江修築壞堤七十二轉長蘆鹽運使運司故利
數自好者不樂居問曰吾欲清是官也終任不取一錢
累遷廣東左布政司嘉靖十一年以治行卓異拜右副
都御史巡撫貴州獨山州賊蒙鉞殺父為亂問聞南丹
泗城欲助送檄廣西撫按伐其謀又檄鉞弟釗復父讐
事平得承襲鉞援絕問督大兵分道入誅之捷問賜金

綺召為兵部右侍郎疏陳武備八事又言兩廣雲貴半
土司深山密箐猺獞羅棘所窟穴邊將喜功名譽好為
掃穴之舉王師每入巨憖潛踪所誅戮率無辜赤子興
大兵費厚餉以易無辜命非陛下好生意宜救邊臣布
威信嚴阨塞謹哨探使各安邊境以絕禍萌帝深納其
言尋引疾歸二十一年召為南京禮部侍郎久之就遷
戶部尚書復引疾去卒於家問清節自勵居官四十年
敝廬蕭然田不滿百畝好學不倦粹然深造為士類所

宗隆慶初謚莊裕

張邦奇字常甫鄞人年十五作易解及釋國語登弘治
末年進士改庶吉士授檢討出為湖廣提學副使下教
曰學不孔顏行不曾閔雖文如雄雉吾且斥之在任三
四年諸生競勸時世宗方為興世子獻皇遣就試乃特
設兩案已居北而使世子居南文成送入學世宗由此
知邦奇嘉靖初提學四川以親老乞歸久之桂萼掌銓
去留天下提學官起邦奇福建未幾選外僚入坊局改

右庶子遷南京祭酒以身為教學規整肅就遷吏部侍郎丁外艱歸帝嘗奉太后謂天壽諸陵語及擇相太后曰先皇嘗言提學張邦奇器識他日可為宰相其人安在帝憬然曰尚未用也服闋即召為吏部右侍郎掌部事推轂善類人不可干以私銓部升除多受教政府邦奇獨否大學士李時銜之郭勛家人犯法舁重賄請寬邦奇不從帝欲即授邦奇尚書為兩人沮止尋改掌翰林院事充日講官加太子賓客改掌詹事府九載考績

晉禮部尚書以母老欲便養乃改南京吏部復改兵部
叅贊機務帝猶念邦奇時與嚴嵩語念之嵩曰邦奇性
至孝母老不樂北來帝信其言遂不召二十三年卒年
六十一贈太子太保謚文定邦奇之學以程朱為宗與
王守仁友善而語每不合躬修力踐跬步必謹畫之所
為夕必書於冊性篤孝以養親故屢起輒退其母後邦
奇卒壽至百歲邦奇事寡嫂如事母所註學庸傳五經
說及文集粹然一出於正族父時徹少邦奇二十歲受

業於邦奇仕至南京兵部尚書有文名

韓邦奇字汝節朝邑人父紹宗福建副使邦奇登正德

三年進士除吏部主事進員外郎六年冬京師地震上

疏陳時政闕失忤旨不報會給事中孫禎等劾臣僚不

職者並及邦奇吏部已議留帝竟以前疏故黜為平陽

通判遷浙江僉事轄杭嚴二府宸濠令內豎假飯僧聚

千人於杭州天竺寺邦奇立散遣之其儀賓託進貢假

道衢州邦奇詰之曰入貢當沿江下奚自假道歸語王

韓僉事不可誑也時中官在浙者凡四人王堂為鎮守

晁進督織造崔瑤主市舶張玉管營造爪牙四出民不

聊生邦奇疏請禁止又數裁抑堂邦奇閔中官採富陽

茶魚為民害作歌哀之堂遂奏邦奇沮格上供作歌怨

謗帝怒逮至京下詔獄廷臣論救皆不聽斥為民嘉靖

初起山東叅議乞休去尋用薦以故官蒞山西再乞休

去起四川提學副使入為春坊右庶子七年偕同官方

鵬主應天鄉試坐試錄謬誤謫南京太僕丞復乞歸起

山東副使遷大理丞進少卿以右都僉御史巡撫宣府
入佐院事進右副都御史巡撫遼東時遼陽兵變侍郎
黃宗明言邦奇素有威望請假以便宜速往定亂帝方
事姑息不從命與山西巡撫任洛換官至山西為政嚴
肅有司供俱悉不納間日出俸米易肉一斤居四年引
疾歸中外交薦以故官起督河道遷刑部右侍郎改吏
部拜南京右都御史進兵部尚書叅贊機務致仕歸三
十四年陝西地大震邦奇隕焉贈太子少保謚恭簡邦

奇性嗜學自諸經子史及天文地理樂律術數兵法之書無不通究著述甚富所撰志樂尤為世所稱第邦靖字汝度年十四舉於鄉與邦奇同登進士授工部主事榷木浙江額不充被劾以守官廉得免進員外郎乾清宮災指斥時政甚切武宗大怒下之詔獄給事中李鐸等以為言乃奪職為民世宗即位起山西左叅議分守大同歲饑人相食奏請發帑不許復抗疏千餘言不報乞歸不待命輒行軍民遮道泣留抵家病卒年三十六

未幾邦奇亦以叅議蒞大同父老因邦靖故前迎皆泣
下邦奇亦泣邦奇嘗廬居病歲餘不能起邦靖藥必分
嘗食飲皆手進後邦靖病急邦奇日夜持弟泣不解衣
者三月及歿衰經蔬食終喪弗懈鄉人為立孝弟碑

周金字子庚武進人正德三年進士授工科給事中累
遷戶科都給事中疏言京糧歲入三百五萬而食者乃
四百三萬當痛為澄汰中官迎佛及監織造者濫乞引
鹽暴橫道路當罷督府馬昂納有姪女弟當誅昂而還

其女朝議用兵土魯番復哈密金言西邊虛憊而土魯

番險遠且青海之寇窺伺西寧不宜計哈密已卒從金

議嘉靖元年由太僕寺少卿遷都察院右僉都御史巡

撫延綏邊人貧甚金為招商聚粟廣屯積芻以時給其

食改撫宣府進右副都御史大同叛卒殺張文錦邊鎮

兵皆驕宣府總督侍郎馮清苛刻諸軍請糧不從且欲

鞭之衆轟然圍清府署金方病出坐院門召諸軍官數

之曰是若輩剝削之過欲痛鞭之軍士氣稍平擁而前

請曰總制不恤我耳金從容諭以利害衆皆散解去得
無變改撫保定巡按御史李新芳疑廣平知縣謀已欲
扶之知府為之解並欲執知府發兵二千捕之知府及
佐貳皆走一城盡空金發其罪狀而都御史王廷相庇
新芳與相爭帝卒下新芳刑部黜官金遷兵部右侍郎
未幾進右都御史總督漕運巡撫鳳陽諸府久之擢南
京刑部尚書就轉戶部二十四年致仕歸歲餘卒贈太
子太保謚襄敏

吳嶽字汝喬汶上人嘉靖十一年進士授戶部主事歷
郎中督餉宣府吏進羨金數千拒之出知廬州府稅課
歲萬金倒輸府嶽以代郵傳費西山薪故供官爨嶽弛
以利民以憂去服除改保定治如廬州歷山西副使浙
江叅政浹廣按察司山西右布政使並以清靜得民遷
右僉都御史巡撫保定六府奏裁徵發冗費十六七民
力遂寬甫浹歲引疾去久之以貴州巡撫徵尋進左都
都御史協理院事隆慶元年歷吏部左右侍郎京察竣

給事中胡應嘉有所申掾獄詣內閣抗聲曰科臣敢留
考察罷黜官有故事乎應嘉遂得譴遷南京禮部尚書
就改吏部抑浮薄杜僥倖南都縉紳憚之上疏陳六事
帝頗納其言尋改兵部叅贊機務未上給由過家病卒
詔贈太子太保謚介肅獄清望冠一時裊躬嚴整尚書
馬森言平生見廉節士二人獄與譚大初耳獄知廬州
時王廷守蘇州以公事過京口獄名為金山遊携酒一
甌肉一斤菜數束廷笑曰止是乎獄亦笑曰足供我兩

人食矣歡竟日而還去廬日假一蓋禦雨至即命還之
譚大初字宗元始興人嘉靖十七年進士授工部主事
憂歸起補戶部改戶科給事中數論事厯兵科左給事
中出為江西副使清軍多所釋御史孫慎以失額為疑
大初曰失額罪小殃民罪大嚴嵩親黨奪民田治之不
少貸遷廣西右叅政投劾歸久之起故官河南未上擢
南京右通政俄遷應天府尹將赴南都而穆宗即位乞
以叅政致仕不許隆慶元年召拜工部右侍郎尋遷戶

部左侍郎督倉場海瑞為僉都御史大初力薦瑞已而
屢疏乞休不允拜南京戶部尚書引疾去家居田不及
百畝卒年七十五謚莊懿

贊曰當正嘉之際士大夫利方為圓貶其素履羔羊素
絲之節寢以微矣陶琰諸人清操峻特卓然可風南都
列卿後先相望不其賢乎琰之督漕充嗣之守禦良永
之遏錢寧周金之弭亂卒所豎立甚偉至琰子之直節
廷弼邦靖之篤行尤無忝其父兄云

明史卷二百一

欽定四庫全書

明史卷二百一考證

陶琰傳世宗嗣位起故官

臣章宗瀛按明實錄世宗

嗣位御史周宣首疏薦琰旋命總督漕運兼巡撫鳳陽傳未晰載謹附識

陶琰傳其冬改南京兵部

臣章宗瀛按琰在南京時

值歲飢乃飭諸曹盡出所積以賑之仍預給軍糧數月皆已行而後聞又裁抑內官貢船之半見獻徵錄

謹附識

王鎮傳乾清宮災

臣

章宗瀛按乾清宮災鎮上陳四

事曰正大本省內臣覈驛遞廣納延見明寔錄傳未
詳載謹附識

王鎮傳陳正本十事

臣

章宗瀛按鎮所陳十事曰正

大本法祖德廣迨訪重詔令禁奢侈求賢才恤民瘼
正風俗復舊制重人命見明實錄謹識

李充嗣傳擢陝西僉事歷雲南按察使正德九年舉治

行卓異累遷右副都御史

臣章宗瀛按充嗣官陝

西時嘗疏劾中官某劉瑾怒之偵其事無所得時充
嗣方除父服侍母養瑾乃撫其服制違限免官瑾誅
起為江西僉事七年由山東副使擢雲南按察使八
年遷本省布政使九年擢順天府尹未至以都御史
王懋中疏薦遂有副都御史之擢見識大錄傳未詳
戴謹附考

李充嗣傳寧王宸濠反

臣章宗瀛按充嗣聞宸濠增

置護衛屢疏指陳反狀請急為捍禦不報見獻徵錄
謹附識

李充嗣傳有建議修蘇松水利者進充嗣工部尚書兼領
水利事未幾世宗嗣位遣工部郎林文需顏如瓌佐
之臣章宗瀛按世宗嗣位充嗣言正德間內府供
用庫新添火者數至五千加派糧米十三萬石宜悉
裁省又陳三事一恤民窮言常賦外宜盡免一均田
則言江南田糧宜畫一一繩監收言各處輸納苦內

臣需索宜令科道監覈帝皆從之見明實錄謹附識

吳廷舉傳發總鎮中官潘忠二十罪

臣章宗瀛按廷

舉為副使時劉瑾索枯省帑解京廷舉謹留備軍瑾怒之會為潘忠所訐乃矯詔罪之見雷禮列卿記謹附識

吳廷舉傳寧王宸濠有逆謀疏陳江西軍政六事

臣

章宗瀛按宸濠嘗致書陸完曰都御史孫燧急宜易慎毋以吳廷舉代也見雷禮列卿記謹附考

吳廷舉傳且引白居易張詠詩語多詆諧

臣章宗瀛

按廷舉所引居易詩月俸百千官二品朝廷准我作
閒人詠詩獨幸太平無一事江南殺老尚書所謂
語多詆諧即此見識大錄謹附識

吳廷舉傳隆慶中追謚清惠

臣章宗瀛按賜謚時並

贈太子少保見明寔錄傳未載謹附識

方良永傳刑部郎中周敏力持乃不坐

臣章宗瀛按

周敏考識大錄及他書皆作周時敏與此互異謹附

考

方良永傳起湖廣副使

臣章宗瀛按良永為湖廣副

使時藍鄆諸賊寇蜀總制洪鍾榭良永赴蜀督畫賊平乃還見獻徵錄謹附識

方良永傳中外交薦拜右副都御史

臣章宗瀛按是

時如御史朱節沈灼皆奏起良永左都御史胡世寧復薦良永自代見明實錄謹附識

王爌傳屢遷刑科給事中

臣章宗瀛按爌遷刑科時

有請勤政務惜老臣專委任三事疏見獻徵錄謹附
識

徐問傳疏陳武備八事

臣章宗瀛按問所陳武備八

事識大錄獻徵錄諸書均無考謹識

韓邦奇傳起山東副使遷大理丞

臣章宗瀛按明實

錄邦奇由山東副使歷河南副使乃有大理之擢傳
未詳載謹附考

欽定四庫全書薈要卷六千七百九十五

史部

明史卷二百二

大學士張廷玉等奉 敕修

列傳第九十

廖紀

王時中

周期雍

唐龍 子汝楫

王杲 王暉

周用 宋景屠僑

聞淵

劉訥 胡纘宗

孫應奎

餘姚孫應奎方鈍

聶豹

李默

萬鏗

周延

潘恩

賈應春

張永明

胡松

績溪胡松

趙炳然

廖紀字時陳東光人弘治三年進士授考功主事屢遷
文選郎中正德中歷工部右侍郎提督易州山廠羨金
無所私遷吏部左右侍郎世宗立拜南京吏部尚書調
兵部參贊機務被論解職嘉靖三年大禮議既定吏部

尚書楊旦赴召道劾張璉桂萼璉萼之黨陳洸遂劾旦而薦紀帝罷旦以紀代之紀疏辭言臣年已七十精力不如喬宇聰明不如楊旦時字旦方為帝所惡不許光祿署丞何淵請建世室祀興獻帝下廷議紀等執不可帝弗從紀力爭曰淵所言干君臣之分亂昭穆之倫蔑祖宗之制臣謹昧死請罷勿議不納會廷臣多諍者議竟寢已條奏三事其末言人材當惜謂正德之季宗社幾危議者但知平定逆藩之功而不知保護京師之力

自陛下繼統老成接踵去新進連茹登以出位喜事為
賢以凌分犯禮為貴伏望陛下於昔年致仕大臣念其
保護之勲量行召用其他降職除名遣戍者使得以才
自効帝但納其正士風重守令二事而已三邊總督楊
一清召還內閣璫等欲起王瓊紀推彭澤王守仁帝不
允復以鄧廷璋王憲名上竟用憲五年正月御史張袞
喻茂堅朱實昌以世廟禮成請宥議禮得罪諸臣璫等
亦以為請章俱下吏部紀等列上四十七人卒報罷御

史魏有本以劾郭勛救馬永謫官給事中沈漢等論救
帝不聽紀從容為言且薦永及楊銳帝納之有本得無
謫紀在南都持議與璉合坐是劾罷璉輩欲引助已遂
首六卿而紀顧數與抵牾璉輩亦不喜年老稱病乞歸
許之去初獻皇實錄成加太子太保至是進少保賜敕
乘傳夫廩視故事有加卒贈太保謚僖靖

王時中字道夫黃縣人弘治三年進士授鄆陵知縣嘗
出郊旋風擁馬首時中曰冤氣也跡得屍胥井乃婦與

所私者殺之遂伏辜召拜御史督察畿輔馬政正德初
請革近畿皇莊不報吏部尚書馬文升致仕時望屬劉
大夏閔珪時中詆珪和媚大夏昏耄兩人各求退焦芳
遂得之衆咸咎時中出按宣大逮繫武職貪汚者百餘
為東廠太監邱聚所奏劉瑾捕時中下詔獄荷重枷於
都察院門時中病甚其妻往省遇都御史劉宇哭且詬
宇不得已言於瑾釋之謫戍鐵嶺衛瑾誅起四川副使
遷湖廣按察使十二年以右僉都御史巡撫寧夏世宗

立召為右副都御史父喪除起故官會上章聖太后尊號時中言本生二字不當去及上冊寶百官陪列不至者九人時中與焉帝責對狀已而賞之歷兵部左侍郎代李鉞為尚書中官黃英等多所陳請時中皆執不可敘薊州平盜功濫及通州守備鄢祐為言官李鳴鶴等所劾時中乞休且詆言者給事中劉世揚等言時中不當逞忿箝言官帝乃切責時中令歸聽勘嘉靖十年四月起復為兵部尚書御史郭希愈請重兵部侍郎之選

以邊臣有才者兩人分掌邊方內地軍務吏部議從之
時中言非祖宗臨時遣將意帝遂從其議帝欲用王憲
於兵部乃調時中刑部尚書坐論御史馮恩獄落職間
住始恩疏詆時中及是以寬恩得罪時稱為長者久之
遇赦復官致仕

周期雍字汝和江西寧州人正德三年進士授南京御
史劉瑾既誅為瑾斥者悉起而給事中李光翰任惠徐
蕃牧相徐暹趙士賢御史貢安甫史良佐曹閔王弘葛

浩姚學禮張鳴鳳王良臣徐鉦趙佑楊璋朱廷聲劉玉
部郎李夢陽王綸孫磐等以兼劾羣閹未得錄期雍偕
同官王佩力請皆召用兵部尚書王敞附瑾進期雍請
斥之焦芳劉宇猶在列而劉大夏韓文楊守隨林瀚張
敷華未雪期雍皆極論陳金討江西賊縱苗殺掠期雍
發其狀尋清軍廣東劾鎮守武定侯郭勛金與勛皆被
責出為福建僉事宸濠反簡銳卒赴討會賊平乃還嘉
靖初為浙江參議討平溫處礦盜予一子官再遷湖廣

按察使九年擢右僉都御史巡撫順天薊州密雲關堡數十以避寇警移入內地關外益無備期雍悉修復之數列上便宜入為大理卿歷刑部左右侍郎右都御史拜刑部尚書大計京官言官劾期雍納賄吏部白其誣詔為飭言者十九年郭勛修前卻因風霾勸帝罷免大臣期雍遂去位家居十年卒

唐龍字虞佐蘭谿人受業於同縣章懋登正德三年進士除郟城知縣禦大盜劉六數敗之加俸二等父喪服

除徵授御史出按雲南錢寧義父參將盧和坐罪當死
寧為奏辯下鎮撫覆勘會遣官錄囚受寧屬欲出和為
龍所持卒正其罪土官鳳朝明罪死死革世職寧令滇
人為保舉而矯旨許之龍抗疏爭寢其事再按江西疏
趣張忠許泰班師三司官從宸濠叛者猶居位龍召數
之曰脅從罔治謂凡民耳若輩讀書食祿何覩顏乃爾
立收其印綬擢陝西提學副使遷山西按察使召為太
僕卿嘉靖七年改右僉都御史總督漕運兼巡撫鳳陽

諸府奏罷淮西官馬種牛罷壽州正陽關權稅通泰二

州虛田租及漕卒船料民甚德之召拜左副都御史歷

吏部左右侍郎十一年陝西大饑濟農擁衆臨邊延綏

告警詔進龍兵部尚書總制三邊軍務兼理振濟齎帑

金三十萬以行龍奏行救荒十四事時濟農居套中西

抵賀蘭山限以黃河不得渡用牛皮為渾脫渡入山後

諳達亦自豐州入套為患龍用總兵官王效梁震數敗

敵屢被獎賚召為刑部尚書大猾劉東山構陷建昌侯

張延齡興大獄延齡昭聖皇太后母弟帝所惡也吏坐
獄不窮竟去者數十人龍獨執正東山罪大禮大獄及
諸建言獲罪者廷臣屢請寬不能得會九廟成覃恩龍
錄上充軍應赦者百四十人率得宥所不原惟豐熙楊
慎王元正馬錄呂經馮恩劉濟邵經邦而已考尚書六
年滿加太子少保以母老乞歸侍養久之用薦起南京
刑部尚書就改吏部兵部尚書戴金罷召龍代之太廟
成加太子太保尋代熊浹為吏部尚書龍有才居官著

勞績及為吏部每事咨僚佐年老多疾輒為所欺御史
陳九德劾前選郎高簡罔上行私并論龍衰暮乃下簡
詔獄龍引疾未報吏科楊上林徐良輔復論簡詔杖簡
六十遣戍上林良輔以不早言罷職龍黜為民龍已有
疾輿出國門卒後數年子修撰汝楫疏辯詔復官贈少
保謚文襄龍故與嚴嵩善龍之罷實夏言主之而汝楫
素附嵩得第一人及第官至左諭德後坐嵩黨奪官

王杲字景初汶上人正德九年進士授臨汾知縣擢御

史巡視陝西茶馬帝遣中官分守蘭靖杲言窮邊饑歲不宜設官累民不報嘉靖三年帝將遣中官督織造於蘇杭杲疏諫不納久之擢太僕少卿改大理再遷左副都御史進戶部右侍郎河南大饑命杲往振杲請急發帑金詔齎臨清倉銀五萬兩以行既至復請發十五萬兩全活不可勝計事竣賜銀幣尋以右都御史總督漕運故事繕運艘軍三民七總兵官顧寰以軍民困敝請發兩淮餘鹽銀七十萬戶部尚書李如圭不可杲請改

折兩年漕運十之三以所省轉輸費治運艘勿重困軍

民報可踰年入為戶部尚書后父安平侯方銳乞張家莊馬房地杲言此地二千餘頃正供所出不可許宜以大慈恩寺入官地二十頃予之帝從其議時國儲告匱諸邊請增餉無虛月四方多水旱給事中李文進請議廣儲蓄杲列九事以獻已又上制財用十事帝咸納之舊制歲漕四百萬石杲以粟有餘而用不足遇災傷率改折以便民一日帝見改折者過半大驚以詰戶部杲

等引罪敕自今務遵祖制毋輕變杲掌邦計事無不辦
帝深倚之後有詔買龍涎香久不進帝以此不悅給事
中馬錫勅杲及巡倉御史艾朴受賄給事中厲汝進言
倉場尚書王暉亦然竝下獄杲朴遣戍暉斥為民杲竟
卒於雷州戍所隆慶初給事中辛自修等訟杲冤詔復
官賜祭葬贈太子太保王暉句容人由進士除吉安推
官從王守仁平宸濠遷大理寺副爭大禮下獄廷杖累
遷右副都御史巡撫江西歷兩京戶部侍郎出督漕運

進尚書歷官著清操

周用字行之吳江人弘治十五年進士授行人正德初擢南京兵科給事中父憂服闋留補禮科已乞南改南京兵科諫迎佛烏斯藏及以中旨遷黜尚書都給事中
等官且請治鎮守江西中官黎安罪出為廣東參議預
平番畧盜有功歷浙江山東副使擢福建按察使改河
南右布政使代監司鞠南陽滯獄獄為之空嘉靖八年
擢右副都御史巡撫南贛召協理院事歷吏部左右侍

郎以起廢不當尚書汪鉉委罪僚屬乃調用南京刑部
就遷右都御史工刑二部尚書九廟災自陳致仕用端
亮有節槩既罷中外皆惜之頻有推薦久之以工部尚
書起督河道數月改漕運未上召拜左都御史二品九
年滿加太子少保二十五年代唐龍為吏部尚書明年
卒官贈太子太保謚恭肅曾孫宗建自有傳用掌憲時
慎自持而已無所獻替其後宋景屠僑繼之大畧皆廉
潔與用相似景未久卒而僑居職八年屬嚴嵩柄政風

紀不振議丁汝夔獄受杖不能去宋景字以賢奉新人
弘治十八年進士知睢州正德五年入為河南道御史
故事知州無改御史者劉瑾創之也瑾誅景引疾去嘉
靖三年以薦補浙江僉事進山西副使民饑為盜殺守
禦指揮景樹幟令被脅者赴之賊咸歸命乃禽斬其魁
四遷山西左布政使累官南京吏工二部尚書改兵部
參贊機務入為左都御史卒贈太子少保吏部尚書諡
莊靖屠僑字安卿吏部尚書瀟再從子也正德六年進

士授御史巡視居庸諸關武宗遣中官李嵩等捕虎豹
僑力言不可世宗時歷左都御史卒贈少保謚簡肅

聞淵字靜中鄞人弘治十八年進士初授禮部主事已
改刑部楊一清為吏部調淵稽勲員外郎歷考功郎中
改掌文選遷南京右通政嘉靖初擢應天府尹改尹順
天累遷南京兵部右侍郎攝部事薦馬永等十餘人召
為刑部右侍郎遷左進南京刑部尚書就移吏部召為
刑部尚書周用卒代為吏部尚書侍郎徐階得帝眷前

尚書率推讓之淵自以前輩事取獨斷大學士夏言柄

政淵老臣不能委曲徇及後議言獄淵謂言事祇任意
跡涉要君請帝自裁決帝大怒切責淵嚴嵩既殺言勢
益橫部權無不侵數以小故奪淵俸淵年七十矣遂乞
骸骨歸家居十四年卒先累加太子太保卒贈少保謚
莊簡淵居官終始一節晚扼權相功名頗損在南刑部
時張璁先為曹屬嘗題詩於壁屬淵勒石後堂淵曰此
尚書堂也吾敢以相君故為郎官勒石耶

劉訥鄆陵人父璟刑部尚書訥登正德十二年進士為
寧國推官攝蕪湖縣事武宗南巡中官索賄不得繫訥
詔獄世宗立復官尋擢御史遷南京通政叅議歷南京
刑部尚書召改北初帝幸承天河南巡撫胡纘宗嘗以
事咎陽武知縣王聯聯尋為巡按御史陶欽夔劾罷聯
素兇狡嘗毆其父良論死久之以良請出獄復坐殺人
求解不得知帝喜告訐乃撫纘宗迎駕詩穆王八駿語
為謗詛言纘宗命已刊布不從屬欽夔論黜羅織成大

辟侯長至日令其子詐為常朝官闌入闕門訟冤凡所
不悅若副都御史劉隅給事中鮑道明御史胡植馮章
張洽參議朱鴻漸知府項喬賈應春等百十人悉構入
之帝大怒立遣官捕纘宗等下獄命詗會法司嚴訊詗
等盡得其誣罔仍坐聯死當其子詐冒朝官律斬而為
纘宗等乞宥帝既從法司奏坐聯父子辟然心嘆纘宗
頗多詰讓下禮部都察院參議嚴嵩為之解乃革纘宗
職杖四十詗亦除名法司正貳停半歲俸郎官承問者

下詔獄嵩以對制平獄有功令兼支大學士俸嵩辭乃
允時法官率翫法徇上意稍執正譴責隨至訥於是獄
能持法身雖黜而天下稱之胡纘宗陝西秦安人正德
三年進士由檢討出為嘉定判官歷山東巡撫改河南
孫應奎字文宿洛陽人正德十六年進士授章邱知縣
嘉靖四年入為兵科給事中上疏言輔臣之任必忠厚
鯁亮純白堅定者乃足當之今大學士楊一清雖練達
國體而雅性尚通難以獨任張璁學博性偏傷於自恃

猶飭厲功名當抑其過而用之至於桂萼以梟雄桀驁之資作威福納財賄阻抑氣節私比黨與勢侵六官氣制言路天下莫不怨憤乞鑒別三臣賢否以定用舍其意特右璫而帝因其奏慰留一清戒諭璫萼既而同官王準陸粲劾璫萼罷相準粲亦下吏遠謫以應奎首抗章不罪未幾劾吏部尚書方獻夫帝頗納其言獻夫援汪鉉為助遂詘應奎議再遷戶科左給事中行人薛侃建言忤旨下廷訊詞連張璫應奎與同官曹忭揖璫避

且上疏言狀帝怒下之詔獄尋釋還職十一年大計天下庶官王準謫富民典史應奎言汪鉉為璫萼修邵誣以不謹而黜之乞復準官責鉉為黨比戒吏部尚書王瓊亦言準當黜乃謫應奎高平縣丞屢遷湖廣副使督采大木坐累復逮繫尋釋還歷右副都御史巡撫順天召理院事遷戶部侍郎進尚書諳達犯京師後羽書旁午徵兵餉應奎乃建議加派自北方諸府暨廣西貴州外其他量地貧富驟增銀一百十五萬有奇而蘇州一

府乃八萬五千御史郭仁吳人也詣應奎請減不從仁
遂劾奏應奎疏辨帝以仁不當私屬調之外既而國用
猶不足應奎言今歲入二百萬而諸邊費六百餘萬一
切取財法行之已盡請令諸曹所隸官吏儒士厨役校
卒悉去其冗者而臣部出入贏縮之數亦綜其大綱列
籍進御使百司庶府咸知為國惜財報可三十一年正
月命應奎條上京邊備用芻糧之數應奎言自臣入都
至今計正稅加賦餘鹽五百餘萬外他所搜括又四百

餘萬而所出自諸邊年例二百八十萬外新增二百四十五萬有奇修邊振濟諸役又八百餘萬帝以耗費多疑有侵冒分遣科道官往諸邊覈實給事中徐公遴劾應奎粗疏自用遂改南京工部尚書以方鈍代諸邊餉銀益增鈍計無所出請令諸臣條上理財策議行二十九事益纖屑傷大體應奎就移戶部致仕歸卒應奎為諫官屢犯權貴以風節自厲晚官計曹一切為苟且計功名大損於前有與應奎同姓名者餘姚人字文卿由

進士授行人擢禮科給事中疏劾汪鉉奸忤旨下詔獄
已復杖闕下謫華亭縣丞鉉亦罷去兩孫給諫之名並
震於朝廷累官右副都御史總理河道踰年罷歸為山
東布政時有創開膠萊河議者應奎力言不可入覲與
吏部尚書爭官屬賢否時稱其直方鈍已陵人掌戶部
七年廉慎無過嚴嵩中之詔改南京遂乞骸骨歸

聶豹字文蔚吉安永豐人正德十二年進士除華亭知
縣濬陂塘民復業者三千餘戶嘉靖四年召拜御史巡

按福建出為蘇州知府憂歸補平陽知府山西頻中寇民無寧居豹令富民出錢罪疑者贖得萬餘金修郭家溝冷泉靈石諸關隘練鄉勇六千守之寇却廷議以豹為知兵給事中劉繪大學士嚴嵩皆薦之擢陝西副使備兵潼關大計拾遺言官論豹在平陽乾沒大學士夏言亦惡豹逮下詔獄落職歸二十九年秋都城被寇禮部尚書徐階豹知華亭時所取士也為豹訟寃言其才可大用立召拜右僉都御史巡撫順天未赴擢兵部右

侍郎尋轉左仇鸞請調宣大兵入衛豹陳四慮謂宜固
守宣大宣大安則京師安鸞怒伺豹過無所得乃已三
十一年召翁萬達為兵部尚書未至卒以豹代之奏上
防秋事宜又請增築京師外城皆報可是年秋寇大入
山西覆總兵官李淶軍大掠二十日而去總督蘇祐反
以大捷聞為巡按御史毛鵬所發章下兵部豹言寇雖
有所掠而我師斬獲過當實上元垂祐陛下威靈所致
宜擇吉祭告論功行賞帝喜進秩任子者數十人豹亦

加太子少保廕錦衣世千戶京師外城成進太子少傅
南北屢奏捷及類奏諸邊功豹率歸功元祐祭告行賞
如初豹亦進太子太保當是時西北邊數遭寇東南倭
又起羽書日數至豹本無應變才而大學士嵩與豹鄉
里徐階亦入政府故豹甚為帝所倚久之寇患日棘帝
深以為憂豹卒無所謀畫條奏皆具文帝漸知其短會
侍郎趙文華陳七事致仕侍郎朱隆禧請設巡視福建
大臣開海濱互市禁豹皆格不行帝大怒切責豹震懾

請罪復辨增官開市之非再下詔譙讓豹愈惶懼條便
宜五事以獻帝意終不懌降俸二級頃之竟以中旨罷
而用楊博代之歸數年卒年七十七隆慶初贈少保謚
貞襄豹初好王守仁良知之說與辨難心益服後聞守
仁歿為位哭以弟子自處及繫獄著困辨錄於王守仁
說頗有異同云

李默字時言甌寧人正德十六年進士選庶吉士嘉靖
初改戶部主事遷兵部員外郎調吏部歷驗封郎中真

人邵元節貴幸請封誥默執不予十一年為武會試同
考官及宴兵部默據賓席欲坐尚書王憲上憲劾其不
遜謫寧國同知屢遷浙江左布政使入為太常卿掌南
京國子監事博士等官得與科道選自默發之歷吏部
左右侍郎代夏邦謨為尚書自正德初焦芳張綵後吏
部無侍郎拜尚書者默出帝特簡蓋異數也嚴嵩柄政
擅黜陟權默每持己意嵩銜之會推遼東巡撫列布政
使張臬謝存儒以上帝問嵩嵩言其不任奪默職為民

以萬鎰代默掌銓僅七月逾年鎰罷特旨復用默已命
入直西內賜直廬許苑中乘馬尋進太子少保未幾復
命兼翰林學士給事中梁夢龍劾默徇私帝為責夢龍
會大計羣吏默戒門下謝賓客同直大臣亦不得燕見
嵩甚恨趙文華視師還默氣折之總督楊宜罷嵩文華
欲用胡宗憲默推王誥代兩人恨滋甚初文華為帝言
餘倭無幾而巡按御史周如斗以敗狀聞帝疑數詰嵩
文華謀所以自解稔帝喜告許會默試選人策問言漢

武唐憲以英睿興盛業晚節用匪人而敗遂奏默誹謗
且言殘寇不難滅以督撫非人敗衄由默恨臣劾其同
鄉張經思為報復臣論曹邦輔即嗾給事中夏棡孫濬
媒孽臣延今半載疆事日非昨推總督又不用宗憲而
用誥東南塗炭何時解陛下宵旰憂何時釋帝大怒下
禮部及法司議奏默偏執自用失大臣體所引漢唐事
非所宜言帝責禮部尚書王用賓等黨護各奪俸三月
而下默詔獄刑部尚書何鰲遂引子罵父律絞帝曰律

不著臣罵君謂必無也今有之其加等斬錮於獄默竟
瘐死時三十五年二月也默博雅有才辨以氣自豪同
考武試得陸炳為門生炳貴盛力推轂默由外吏驟顯
有所恃不附嵩凡有銓除與爭可否氣甚壯然性褊淺
用愛憎為軒輊頗私鄉舊以恩威自歸士論亦不甚附
之默既得罪繼之者吳鵬歐陽必進視嵩父子意承順
惟謹吏部權盡失隆慶中復默官子祭葬萬厯中賜諡
文愍萬鏜字仕鳴進賢人父福金華知府鏜登弘治十

八年進士正德中由刑部主事屢遷吏部文選郎中司
署火下獄贖還職歷太常大理少卿世宗嗣位以鏜嘗
貽書知縣劉源清令預防宸濠賚金幣尋遷順天府尹
累遷右副都御史歷兵部侍郎右都御史皆南京彗星
見應詔陳八事中言人邪正相懸而形迹易混其大較
有四人主所取於下者曰任怨曰任事曰恭順曰無私
而邪臣之恣強戾好紛更巧逢迎肆攻訐者其迹似之
人主所惡於下者曰避事曰沽名曰朋黨曰矯激而正

臣之守成法恤公議體羣情規君失者其迹似之察之不精則邪正倒置而國是亂矣此不可不慎也治天下貴實不貴文今陛下議禮制度考文至明備矣而於理財用人安民講武之道或有缺焉願輟聲容之繁飾略太平之美觀而專從事於實用斯治天下之道得矣至大禮大獄得罪諸臣幽錮已久乞量加寬錄帝大怒斥為民令吏部錮勿用家居十年屢推薦輒報罷同年生嚴嵩柄政援引之湖廣蜡爾山蠻叛起鎧副都御史相

機勦撫鎧納土指揮田應朝策誘致其酋督兵破之條

上善後七事帝咸報可召鎧還未幾銅平酋龍子賢復
叛御史繆文龍言鎧勦撫皆失詔下撫按官勘覆歸罪
於參將李經事乃解鎧得為兵部侍郎遷南京刑禮二
部尚書召掌刑部俄代李默為吏部尚書鎧既為嵩所
引每事委隨又頗通饋遺撫治鄖陽都御史闕鎧以通
政使趙文華名上會給事中朱伯辰劾文華文華上言
納言之職例不外推鎧意在出臣又嗾所親伯辰論劾

欲去臣且鎗以侍郎起用乃朦朧奏二品九年滿得加
太子少保又以不得一品面謾腹誹無大臣禮帝怒遂
與伯辰竝黜為民久之卒隆慶初復官贈太子太保

周延字南喬吉水人嘉靖二年進士除潛江知縣改新
會擢兵科給事中時議新建伯王守仁罪將奪其爵延
抗疏為訟坐謫太倉州判官歷南京吏部郎中出為廣
東參政撫安南征黎寇皆預有功三遷廣東左布政使
以右副都御史巡撫應天靖海寇林成亂進兵部右侍

郎提督兩廣軍務召為刑部左侍郎歷南京右都御史
吏兵二部尚書嘉靖三十四年召為左都御史帝用給
事中徐浦議令廷臣及督撫各舉邊才於是故侍郎郭
宗皋都御史曹邦輔吳嶽祭酒鄒守益修撰羅洪先御
史吳悌方涯主事唐樞參政周大禮曹亨叅議劉志知
府黃華在舉中御史羅廷唯駁曰浦疏本言邊才而今
廷臣乃以清修苦節實學懿行舉去初議遠矣况又有
黃緣進者是假明詔開倖門帝納其言責吏部濫舉命

與都察院更議延與尚書吳鵬等言所舉皆人望公無私帝終不悅切責延等而舉者悉報罷世宗時海內賢士大夫被斥者衆及是舉上稍冀復用而為廷唯所阻自是皆不復召矣延顏面寒峭砥節奉公權臣用事政以賄成延未嘗有染然居臺端七年無諫諍名卒官贈太子太保謚簡肅延卒歐陽必進代踰月遷吏部乃以潘恩繼之恩字子仁上海人嘉靖二年進士授祁州知州調繁鉤州鉤徽王封國也宗戚豪悍恩約束之擢南

京刑部員外郎遷廣西提學僉事署按察使事有大猾
匿靖江王所捕之急王不得已出之憾恩誣以事按無
實得免累遷山東副使御史葉經以試錄忤旨竝恩下
詔獄謫廣東河源典史四遷復為江西副使進浙江左
參政按部海鹽倭猝至圍城數匝恩與參將湯克寬僉
事姜廷頤力禦却之俄遷浙江左布政使以右副都御
史巡撫河南偕按臣劾徽王載堉貪虐遂奪國伊王典
橫驕橫恩一切裁之河南民素苦藩府恩制兩悍王名

大著久之由刑部尚書改左都御史子允端為刑部主事吏部尚書郭朴恩門生也調之禮部給事中張益劾允端奔競恩溺愛朴徇私帝置朴不問改允端南京工部令恩致仕萬厯初賜存問卒年八十七贈太子少保諡恭定

賈應春字東陽真定人嘉靖二年進士授南陽知縣遷和州知州入為刑部郎中歷知潞安開封二府遷陝西副使未赴河南巡按陳蕙劾其貪濫謫山東鹽運同知

蕙亦坐貶久之由漢陽知府復遷陝西副使進右參政
寧羌賊起會兵討平之遷按察使左右布政使皆在陝
西就拜右副都御史巡撫其地三十二年進兵部右侍
郎總督三邊軍務諳達諸部歲擾邊應春言諸邊間謀
不通每寇入莫測其向我則無所不備兵分勢孤往往
失事夫寇將內犯必聚衆治器腊肉飼馬傳箭祭旗其
形先露而我民被掠者間亦臨邊傳報頗有左驗使邊
臣厚以官賞令密偵候視漫然散守者功相十百乃定

賞格以請帝立從之其秋寇大入延綏殺掠五千餘人
應春督諸將邀擊獲首功二百四十以捷聞而巡按御
史吉澄極言敗狀帝竟錄應春功官其一子明年罷宣
大總督蘇祐以應春代時秋防將屆代應春者江東未
至今仍舊任套寇數萬人屯寧夏山後先遣騎五百餘
入掠總兵官姜應熊守紅井以綴敵而密遣精兵薄其
營斬首百四十餘級進應春右都御史踰月寇別部入
永昌西寧為守將所破番人入鎮羌總兵官王繼祖擊

敗之竝賜應春銀幣久之寇五千騎犯環慶為都督袁
正所破掠莊涼守將邀斬百二十人再予應春一子官
在鎮數載築邊垣萬一千八百餘丈以花馬池閒田二
萬頃給軍屯墾邊人賴之徵拜南京戶部尚書論邊垣
功進秩一等旋召為刑部尚書改戶部國用不足應春
以為言因命徵不及七分者所司毋遷官漕政廢弛運
艘多逋負亦以應春言重其罰歲餘致仕去卒贈太子
太保

張永明字鍾誠烏程人嘉靖十四年進士除蕪湖知縣
獻皇后梓宮南祔所過繁費不貲永明堊江岸佛舍為
殿供器飾箔金財用大省尋擢南京刑科給事中寇入
大同山西總督樊繼祖巡撫史道陳講等不能禦永明
偕同官論其罪己又劾兵部尚書張瓚黷貨悞國又劾
大學士嚴嵩及子世蕃貪污狀已又劾兵部尚書戴金
為御史巡鹽時增餘鹽羨銀阻壞邊計疏雖不盡行中
外憚之出為江西參議累遷雲南副使山西左布政使

以右副都御史巡撫河南伊王典模恣橫永明發其惡
後竟伏辜四十年遷刑部右侍郎未上改吏部進左尋
拜刑部尚書居數月改左都御史條上飭厲撫按六事
御史黃廷聘按浙歸道湘潭慢知縣陳安安發其寢得
所攜金銀貨幣廷聘惶恐謝乃還之永明聞劾罷廷聘
浙江參政劉應箕先為廷聘論罷見廷聘敗撫其陰事
自辨永明惡之劾應箕亦斥故事京官考滿自翰林外
皆報名都察院修庭謁禮後吏部郎恃權張瀛廢報名

陸光祖廢庭謁永明榜令遵故事列儀節奏聞詔諸司
遵守郎中羅良當考滿先詣永明郎約免報名庭謁乃
過院永明怒疏言此禮行百年非臣所能損益良輕薄
無狀當罷又卿貳大臣考滿詣吏部與堂官相見訖即
詣四司門揖司官輒南面答揖亦非禮當改正良疏辨
奪俸詔禮部會禮科議之奏言永明議是自今吏部郎
其承舊制九卿翰林官揖四司當罷詔可永明素清謹
掌憲在嚴嵩罷後以整飭綱維為已任會給事中魏時

亮劾永明力求去詔許馳驛歸明年卒贈太子少保謚莊僖

胡松字汝茂滁人幼嗜學嘗輯古名臣章奏慨然有用世志登嘉靖八年進士知東平州設方畧捕盜民賴以安再遷南京禮部郎中歷山西提學副使三十年秋上邊務十二事謂去秋諳達掠興嵐即傳箭徵兵尅期深入守臣皆稔聞之而巡撫史道總兵官王陞等備禦無素待其壓境始以求貢上聞又陰致賄遺令勿侵已分

地冀嫁禍他境今山西之禍實大同貽之宜亟寘重典以厲諸鎮大同自兵變以來壯士多逃漠北為寇用今宜招使歸有攜畜產器械來者聽其自有更給牛種費優復數年則我捐金十萬可得壯士二萬拊而用之皆勁旅也孰與棄之以資強敵哉大同最敵衝為鎮巡者較諸邊獨難今宜不拘資格精擇其人豐給祿廩使得收召猛士畜養健丁又久其期非十年不得代彼知不可驟遷必不為苟且旦夕計而邊圉自固又必稍寬文

網非大千憲典言官毋得輕劾以壞其成功至用間之道兵家所貴今寇謀獲於山西者已數十人他鎮類是故我之虛實彼無不知今宜厚養死士潛縱遣之得間則斬其名王部長及諸用事貴人否亦可覘強弱虛實而陰為備又寇貪而好利我誠不愛金帛東賂黃毛三衛以牽其左西收伊伯格勒遺種子善地以綴其右使首尾掣曳自相狼顧則我可起承其敝坐收全勝矣他所條析咸切邊計帝嘉其忠懇進秩左參政松䟽上當事

者已惡其侵官及遷擢益忌之不畀以兵柄令於三關
聽用欲因以陷之寇大入抵太原給事中馮良知遂劾
松建言冒賞無寸功紀功科道官張堯年王珩劾總兵
官張達等竝論松虛議無補遂斥為民家居十餘年屢
薦輒報罷至三十五年以趙文華言起陝西參政分守
平涼復條嚴保甲均賦稅置常平簡伉健數事三遷江
西左布政使以右副都御史巡撫其地所部多盜松奏
設南昌南豐萬安三營遣將討捕以次削平進兵部右

侍郎巡撫如故以會討廣東巨寇張璉及援閩破倭功
兩賜銀幣居三年召理部事進左侍郎改吏部遷南京
兵部尚書參贊機務代郭朴為吏部尚書奏言撫按舉
劾每舉數十人虛譽浮詞往往失實所劾犯贓僅擬降
調罷輒貪殘僅擬改教賞罰不當人何所激勸且巡撫
歲終例有冊第屬吏賢否今皆寢閣乞申飭其欺玩者
帝嘉納之松潔已好修富經術鬱然有聲望晚主銓柄
以振拔淹滯為已任甫七月病卒贈太子少保謚恭肅

時又有胡松者字茂卿績溪人正德九年進士嘉靖時
為御史桂萼薦王瓊松論之忤旨謫廉州推官累官工
部尚書伊王欲拓其洛陽府第計直十萬金以十二賕
嚴嵩期必得松據祖制爭乃止諳達入寇仇鸞以邊衆
入衛欲悉召其衆實京師移武庫仗於營便給調松言
邊兵外也而內之武庫仗內也而外之非所以重肘腋
杜微慎防也執弗許尋引疾歸卒年八十三居家以孝
友稱

趙炳然字子晦劍州人嘉靖十四年進士除新喻知縣徵拜御史與給事中李文進覈宣大山西兵餉劾前後督撫樊繼祖史道監司楊銳指揮馮世彪等一百七十七人侵冒罪坐謫有差條上備邊十二事歷按雲南浙江擢大理寺丞進少卿尋改右僉都御史巡撫湖廣進左副都御史協理院事浙江福建總督胡宗憲下獄詔罷總督毋設大學士徐階以浙江寇甫平請設巡撫綏輯遂進炳然兵部右侍郎兼右僉都御史往任之浙罹

兵燹久又當宗憲汰侈後財匱力絀炳然庶以率下悉更諸政令不便者仍奏減軍需之半民皆尸祝之福建巡撫游震得請浙兵勦賊詔發義烏精兵一萬命副總兵戚繼光將以往仍諭炳然協勦炳然言福建所以致亂者由將吏撫馭無術民變為兵兵變為盜耳今又驅浙兵以赴閩急竊懼浙之復為閩也請令一意團練土著使人各為用家自為守急則兵緩則農然後聚散兩有所歸即不得已而召募亦必先本土後鄰壤庶無釀

禍本又條上防海八事中言蘇松浙江水師皆統於總

兵駐定海陸師皆統於副總兵駐金山衛竝受總督節

制今督府既革則已判為二鎮彼此牽制不得調發請

畫地分轄各兼水陸軍務俱報可其年繼光破賊瀕海

餘寇流入浙江官軍迎戰於連嶼陡橋石坪斬首百餘

級新倭復犯石坪將士乘勝殲之炳然以援勦功再賜

金幣進右都御史兼兵部右侍郎給事中辛自修劾罷

戎政都御史李鋹請擇素知兵者代之乃召炳然為兵

部尚書協理戎政踰年詔兼右都御史總督宣大山西
軍務新平平遠保平三堡密邇宣府舊屬大同天成相
去六十里孤懸塞外隔崇山寇騎時出沒炳然奏添設
參將別為一營報可尋以總兵官馬芳等却敵功被賚
已召還部代楊博為尚書考滿加太子少保炳然清勤
練達所至有聲績隆慶初以病乞休去卒贈太子太保
諡恭襄

贊曰世宗朝璫萼言嵩相繼用事六卿之長不得其職

大都波流茅靡泆忍取容廖紀以下諸人其矯矯者與
應奎司邦計不能節以制度顧務加賦以病民貳也碌
碌彌無足觀矣

明史卷二百二

欽定四庫全書

明史卷二百二考證

廖紀傳被論解職

臣章宗瀛按被論解職史不詳何

事即考之廖紀墓誌銘亦止云因人言求退章再上
獲允而下不詳其事他書並無可考謹識

廖紀傳卒贈太保

臣章宗瀛按廖紀墓誌銘紀卒贈

少傅與史互異並載賜祭九壇命工部營葬史未之

載謹識

王時中傳坐論御史馮恩獄落職閒住

臣章宗瀛按

坐論御史馮恩獄落職閒住及恩疏詆時中史俱未

詳原妄考獻徵錄馮恩疏列輔臣六曹長貳過為軒

輊械繫詔獄疏中謂時中為具臣而時中且言御史

糾舉職也何罪因而落職人服時中雅量云謹附識

唐龍傳錢寧義父叅將盧和當死

臣章宗瀛按盧和

坐罪當死考和為叅將時以火鍛人死屍又強奪生

員妻事發問斬罪事詳獻徵錄謹識

王杲傳杲列九事以上已又上制財用十事

臣章宗

瀛按九事十事史未詳載他書亦無可考

王杲傳隆慶初給事中辛自修等訟杲寃詔復官賜祭

葬贈太子太保

臣章宗瀛按七鄉表杲于嘉靖二

十六年五月加太子少保考獻徵錄所載與表同傳
僅言隆慶初贈太子太保謹識

聞淵傳字靜中

臣章宗瀛按淵字靜中考明書作靜

夫而獻徵錄所載與此同謹識

劉訥傳訥于是獄能持法身雖黜而天下稱之

臣章

宗瀛按獻徵錄訥卒于嘉靖三十八年九月年七十

五 謹附識

孫應奎傳既而王準陸粲劾璫罷相準粲亦下吏遠

謫 臣章宗瀛按王準陸粲劾璫及應奎劾方獻

夫事詳張璫諸人本傳謹識

孫應奎傳王準謫富民典史應奎言汪鉉為璫萼修部

誣以不謹而黜之乞復準官責鉉為黨比

臣章宗

瀛按王準傳云璵等罷準亦下吏謫富民典史稍遷
知縣都御史汪鉉希璵旨以考察罷之與此互異謹
識

孫應奎傳以方鈍代諸邊餉銀益增鈍計無所出請令
諸臣條上理財策議行二十九事

臣章宗瀛按二

十九事史未詳載他書亦無可考謹識

聶豹傳會侍郎趙文華陳七事致仕侍郎朱隆禧請設
巡視福建大臣開海濱互市豹皆格不行帝大怒詔

切責豹震懾請罪復辦增官開市之非再下詔譙讓
豹愈惶懼條便宜五事以獻帝意終不悞

臣章宗

瀛按趙文華陳七事及豹條便宜五事史未詳載他
書亦無可考謹識

李默傳萬鎰附慧星見應詔陳八事

臣章宗瀛按八

事史僅舉其三餘未臚列考獻徵錄云公推薦辦國
是審蠲除通鹽法裕邊儲廣矜宥正憲體先務寔謹

附識

李默傳萬鐘附條上善後七事帝咸報可召鐘還

臣

章宗瀛按七事史未詳載考獻徵錄云廣修船處工
料循舊例酌起運青草場嚴點閱修馬政謹識

張永明傳改左都御史條上飭厲撫按六事

臣章宗

瀛按獻徵錄云永明條上六事悉切時弊但亦未詳
其目他書皆無可考謹識

胡松傳上邊務十二事

臣

章宗瀛按十二事史未全

載考名臣寔錄云懲苟玩堅障堠懷携貳蓄孽牧慎

任使利器具廣間謀清耗蠹嚴備禦核屯戍預積貯
撫傷痍

胡松傳三遷江西左布政使以右副都御史巡撫其地
所部多盜松奏設南昌南豐萬安三營遣將討捕以
次削平

臣章宗瀛按識大錄獻徵錄及名臣實錄

俱載松平盜時因議曰豫章為閩廣下流常受其衝
莫若于要地增置城濠屯戍守先事而待之復減租
稅理冤獄舉賢才黜貪墨民得蘇息史未之載謹附

識

趙炳然傳條上備十二事

臣

章宗瀛按十二事史未

詳載他書亦無可考謹識

趙炳然傳又條上防海八事

臣

章宗按按八事史僅

舉其一餘未詳載他書亦無可考謹識

趙炳然傳給事中辛自修劾罷戎政都御史李鐸

臣

章宗瀛按李鐸被劾史未詳何事他書亦無可考謹

識

趙炳然傳卒贈太子太保

臣章宗瀛按卒贈太子太

保考七鄉表云隆慶元年四月趙炳然加太子太保

告病與此互異謹識



